

KALIKATA LITTLE MAGAZINE LIBRARY-O-GABESHANA KENDRA
18/M TAMER LANE, KOLKATA-700009

Record No. : KLMLGK 2007/	Place of Publication : <i>৬৫ (সিবিএল) স্ট্রিট, কলকাতা</i>
Collection : KLMLGK	Publisher : <i>শ্রীমতী চৌধুরী</i>
Title : <i>সবুজ পত্র (SABUJ PATRA)</i>	Size : <i>7.5" x 6"</i>
Vol. & Number : <i>4/6-7</i> <i>4/8</i> <i>4/9</i> <i>4/10</i> <i>4/11</i> <i>4/12</i>	Year of Publication : <i>১৯২৮-১৯৩০ ১৯২৮</i> <i>১৯২৮ ১৯২৮</i> <i>১৯২৮ ১৯২৮</i> <i>১৯২৮ ১৯২৮</i> <i>১৯২৮ ১৯২৮</i>
Editor : <i>শ্রীমতী চৌধুরী</i>	Condition : Brittle / Good ✓
Remarks :	

C.D. Roll No. : KLMLGK



ছন্দ ।

—:—

শুধু কথা যখন খাড়া দাঁড়িয়ে থাকে তখন কেবলমাত্র অর্থকে প্রকাশ করে। কিন্তু সেই কথাকে যখন বিশেষ গতি দেওয়া যায় তখন সে আপন অর্থের চেয়ে আরও কিছু বেশি প্রকাশ করে। সেই বেশিটুকু যে কি তা বলাই শক্ত। কেননা তা কথার অতীত, স্তূভাং অনির্বচনীয়। যা আমরা দেখি শুনি জানি তার সঙ্গে যখন অনির্বচনীয়ের যোগ হয় তখন তাকেই আমরা বলি রস—অর্থাৎ সে-জিনিসটাকে অনুভব করা যায়, ব্যাখ্যা করা যায় না। সকলে জানেন এই রসই হচ্ছে কাব্যের বিষয়।

এইখানে একটা কথা মনে রাখা দরকার—অনির্বচনীয় শব্দটার মানে অভাবনীয় নয়। তা যদি হত তাহলে ওটা কাব্যে অকাব্যে কুকাব্যে কোথাও কোনো কাজে লাগত না। বস্তু পদার্থের সংজ্ঞা নির্ণয় করা যায় কিন্তু রস পদার্থের করা যায় না। অথচ রস আমাদের একান্ত অনুভূতির বিষয়। গোলাপকে আমরা বস্তুরূপে জানি, আর গোলাপকে আমরা রসরূপে পাই। এর মধ্যে বস্তু-জানাকে আমরা সাদা কথায় তার আকার আয়তন ভার কোমলতা প্রভৃতি বহুবিধ পরিচয়ের দ্বারা ব্যাখ্যা করতে পারি কিন্তু রস-পাওয়া এমন একটি অখণ্ড ব্যাপার যে তাকে তেমন করে সাদা কথায় বর্ণনা করা যায় না—কিন্তু তাই বলেই সেটা অলৌকিক অদ্ভুত অসামান্য কিছুই নয়। বরঞ্চ রসের অনুভূতি বস্তু-জ্ঞানের চেয়ে আরো প্রবলতর গভীরতর। এই জন্ম গোলাপের আনন্দকে আমরা

যখন অস্তুর মনে সঞ্চার করতে চাই তখন সে একটা সাধারণ অভিজ্ঞতার রাস্তা দিয়েই করে থাক। তফাৎ এই, বস্তু-অভিজ্ঞতার ভাষা মাদা কথার বিশেষণ, কিন্তু রস-অভিজ্ঞতার ভাষা আকার ইঙ্গিত সুর এবং রূপক। পুরুষের যে-পরিচয় হচ্ছে তিনি আপিসের বড় বাবু সেটা আপিসের খাতা পত্র দেখলেই জানা যায়, কিন্তু মেয়ের যে-পরিচয় তিনি গৃহলক্ষ্মী সেটা প্রকাশের জন্তে তাঁর সিঁথেয় সিঁদূর, তাঁর হাতে কঙ্কণ। অর্থাৎ এটার মধ্যে রূপক চাই, অলঙ্কার চাই, কেননা কেবল মাত্র তথ্যের চেয়ে এ যে বেশি—এর পরিচয় শুধু জ্ঞানে নয় হৃদয়ে। এ যে গৃহলক্ষ্মীকে লক্ষ্মী বলা গেল এইটাই ত হল একটা কথার ইসারা মাত্র—অথচ আপিসের বড় বাবুকে ত আমাদের কেরাগী-নারায়ণ বলবার ইচ্ছাও হয় না, যদিও ধর্মতত্ত্বে বলে থাকে সকল নরের মধ্যেই নারায়ণের স্মারিত্ব আছে। তাহলেই বোঝা যাচ্ছে আপিসের বড় বাবুর মধ্যে অনির্বচনীয়তা নেই—কিন্তু যেখানে তাঁর গৃহিণী সাক্ষী সেখানে তাঁর মধ্যে আছে। তাই বলে এমন কথা বলা যায় না, যে এ বাবুটিকেই আমরা সম্পূর্ণ বুঝি আর মা'লক্ষ্মীকে বুঝি নে—বরঞ্চ উল্টোটা। কেবল কথা এই, যে, বোঝবার বেলায় মা'লক্ষ্মী যত সহজ বোঝাবার বেলায় তত নয়।

“কেবা শুনাইল শ্যাম নাম।” ব্যাপারটা ঘটনা হিসাবে সহজ। কোনো এক ব্যক্তি দ্বিতীয় ব্যক্তির কাছে তৃতীয় ব্যক্তির নাম উচ্চারণ করেছে। এমন কাণ্ড দিনের মধ্যে পঞ্চাশবার ঘটে। এটুকু বলবার জন্তে কথাকে বেশি নাড়া দেবার দরকার হয় না। কিন্তু নাম কানের ভিতর দিয়ে যখন মরমে গিয়ে পাল—অর্থাৎ এমন জায়গায় কাজ করতে থাকে যে-জায়গা দেখা শোনার অতীত, এবং এমন কাজ করতে থাকে

যাকে মাথা যায় না, ওজন করা যায় না, চোখের সামনে দাঁড়া করিয়ে যার সাক্ষ্য নেওয়া যায় না, তখন কথাগুলোকে নাড়া দিয়ে তাদের পুরো অর্থের চেয়ে তাদের কাছ থেকে আরো অনেক বেশি আদায় করে নিতে হয়। অর্থাৎ আবেগকে প্রকাশ করতে গেলে কথার মধ্যে সেই আবেগের ধর্ম সঞ্চার করতে হয়। আবেগের ধর্ম হচ্ছে বেগ। কথা যখন সেই বেগ গ্রহণ করে তখনই আমাদের হৃদয়-ভাবের সঙ্গে তার মিল ঘটে।

এই বেগের কত বৈচিত্র্যই যে আছে তার ঠিকানা নেই। এই বেগের বৈচিত্র্যই ত আলোকের রং বদল হচ্ছে, শব্দের সুর বদল হচ্ছে, এবং লীলাময়ী সৃষ্টি রূপ থেকে রূপান্তর গ্রহণ করছে। এমন কি সৃষ্টির বাহিরের পর্দা সরিয়ে ভিতরের রহস্য-নিকেতনে যতই প্রবেশ করা যায় ততই বস্তু ঘুচে গিয়ে কেবল বেগই প্রকাশ পেতে থাকে। শেষকালে এই কথাই মনে হয় প্রকাশ-বৈচিত্র্যের মূলে বুদ্ধি এই বেগ-বৈচিত্র্য। যদিদং সর্বং প্রাণ এজতি নিঃসৃতং।

মানুষের সত্তার মধ্যে এই অনুভূতিলোকই হচ্ছে সেই রহস্যলোক যেখানে বাহিরের রূপজগতের সমস্ত বেগ অন্তরে আবেগ হয়ে উঠেছে, এবং সেই অন্তরের আবেগ আবার বাহিরে রূপ গ্রহণ করবার জন্তে উৎসুক হচ্ছে। এই জন্তে বাক্য যখন আমাদের অনুভূতিলোকের বাহনের কাজে ভর্তি হয় তখন তার গতি না হলে চলে না। সে তার অর্থের দ্বারা বাহিরের ঘটনাকে ব্যক্ত করে, গতির দ্বারা অন্তরের গতিকে প্রকাশ করে।

শ্রামের নাম রাখা শুনেচে। ঘটনাটা শেষ হয়ে গেচে। কিন্তু যে-একটা অদৃশ্য বেগ জন্মাল তার আর শেষ নেই। আসল ব্যাপারটা

হল তাই। সেই জন্মে কবি ছন্দের বাহুরের মধ্যে এই কথাটাকে দুলায়ে দিলেন। যতক্ষণ ছন্দ থাকবে ততক্ষণ এই দোলা আর থামবে না। “সই, কেবা শুনাইলে শ্যাম নাম।” কেবলি ঢেট উঠতে লাগল। ঐ কটি কথা ছাপার অক্ষরে যদিও ভাল মানুষের মত দাঁড়িয়ে থাকার ভান করে কিন্তু ওদের অন্তরের স্পন্দন আর কোনো দিনই শাস্ত হবে না। ওরা অস্থির হয়েছে, এবং অস্থির করাই ওদের কাজ।

আমাদের পুরাণে ছন্দের উপস্থিতির কথা যা বলেচে তা সবাই জানেন। দুটি পাখীর মধ্যে একটিকে যখন ব্যাধ মারলে তখন বাঙ্গালীকি মনে যে-বাথা পেলেন সেই ব্যাধা শ্লোক দিয়ে না জানিয়ে তাঁর উপায় ছিল না। যে-পাখীটা মারা গেল এবং আর যে-একটি পাখী তার জন্মে কাঁদল তারা কোনকালে লুপ্ত হয়ে গেছে। কিন্তু এই নিদারুণতার ব্যাধটিকে ত কেবল কালের মাণকাঠি দিয়ে মাপা যায় না। সে যে অনন্তের বুক থেকে বেজে রইল। সেই জন্মে কবির শাপ ছন্দের বাহনকে নিয়ে কাল থেকে কালান্তরে ছুটতে চাইলে। হায়রে, আজও সেই ব্যাধনানা অস্ত্র হাতে নানা বীভৎসতার মধ্যে নানা দেশে নানা আকারে ঘুরে বেড়াচ্ছে। কিন্তু সেই আদিকবির শাপ শাস্ত-কালের কণ্ঠে ধনিত হয়ে রইল। এই শাস্ত-কালের কথা কে প্রকাশ করবার জন্মেই ত ছন্দ।

আমরা ভাবায় বলে থাকি, কথাকে ছন্দে বাঁধা। কিন্তু একেবল বাইরে বাঁধন, অন্তরে মুক্তি। কথাকে তার জড়ধর্ম থেকে মুক্তি দেবার জন্মেই ছন্দ। সেতারের তার বাঁধা থাকে বটে কিন্তু তার থেকে সুর পায় ছাড়া। ছন্দ হচ্ছে সেই তার-বাঁধা সেতার, কথার অন্তরের সুরকে সে ছাড়া দিতে থাকে। ধনুকের সে ছিল, কথাকে সে তীরের মত লক্ষ্যের মর্শের মধ্যে প্রক্ষেপ করে।

গোড়াতেই ছন্দ সম্বন্ধে এতখানি ওকালতি করা হয় ত বাহুল্য বলে অনেকের মনে হতে পারে। কিন্তু আমি জানি এমন লোক আছেন যাঁরা ছন্দকে সাহিত্যের একটা কৃত্রিম প্রথা বলে মনে করেন। তাই আমাকে এই গোড়ার কথাটা বুঝিয়ে বলতে হল যে, পৃথিবী ঠিক চব্বিশ ঘণ্টার ঘূর্ণিলয়ে তিনশো পঁয়ষট্টি মাত্রার ছন্দ সূর্য্যকে প্রদক্ষিণ করে, সেও যেমন কৃত্রিম নয়, ভাবাবেগ তেমনি ছন্দকে আশ্রয় করে' আপন গতিক প্রকাশ করবার যে চেহারা করে সেও তেমনি কৃত্রিম নয়।

এইখানে কাব্যের সঙ্গে গানের তুলনা করে আলোচ্য বিষয়টাকে পরিষ্কার করবার চেষ্টা করা যাক।

সুর পদার্থটাই একটা বেগ। সে আপনার মধ্যে আপনি স্পন্দিত হচ্ছে। কথা যেমন অর্থের মোস্তারি করবার জন্মে, সুর তেমন নয়— সে আপনাকেই আপনি প্রকাশ করে। বিশেষ সুরের সঙ্গে বিশেষ সুরের সংযোগে ধ্বনি-বেগের একটা সমবায় উপপন্ন হয়। তাল সেই সমবেত বেগটাকে গতিদান করে। ধ্বনির এই গতি-বেগে আমাদের হৃদয়ের মধ্যে যে গতি সঞ্চার করে সে একটা বিশুদ্ধ আবেগ মাত্র— তার যেন কোনো অবলম্বন নেই। সাধারণত সংসারের আমরা কতকগুলি বিশেষ ঘটনা আশ্রয় করে স্নেহে দুঃখে বিচলিত হই। সেই ঘটনা সত্যও হতে পারে, কাল্পনিকও হতে পারে অর্থাৎ আমাদের কাছে সত্যের মত প্রতিভাত হতে পারে। তারই আঘাতে আমাদের চেতনা নানা রকমে নাড়া পায়—সেই নাড়ার প্রকার-ভেদে আমাদের আবেগের প্রকৃতি-ভেদ ঘটে। কিন্তু গানের সুরে আমাদের চেতনাকে যে-নাড়া দেয় সে কোনো ঘটনার উপলক্ষ্য দিয়ে নয়, সে একেবারে অব্যবহিত-

ভাবে। হৃৎকরং তাতে যে আবেগ উৎপন্ন হয় সে অহৈতুক আবেগ। তাতে আমাদের চিন্তা নিজের স্পন্দন-বেগেই নিজেকে জানে—বাইরের সঙ্গে কোনো ব্যবহারের যোগে নয়।

সংসারে আমাদের জীবনে যে সব ঘটনা ঘটে তার সঙ্গে নানা দায় জড়ানো আছে। জৈবিক দায়, বৈষয়িক দায়, সামাজিক দায়, নৈতিক দায়। তার জন্মে নানা চিন্তায় নানা কাজে আমাদের চিত্তকে বাইরে বিক্ষিপ্ত করতে হয়। শিল্পকলায়, কাব্যে এবং রস-সাহিত্যে মাত্রই আমাদের চিন্তাকে সেই সমস্ত দায় থেকে মুক্তি দেয়। তখন আমাদের চিন্তা স্বেচ্ছা চূড়ান্তের মধ্যে আপনারই বিশুদ্ধ প্রকাশ দেখতে পায়। সেই প্রকাশই আনন্দ। এই প্রকাশকে আমরা চিরস্থান বলি এই জন্মে, যে, বাইরের ঘটনাগুলি সংসারের জাল বুনতে বুনতে নানা প্রয়োজন সাধন করতে করতে সরে যায় চলে যায়, তাদের নিজের মধ্যে নিজের কোনো চরম মূল্য নেই। কিন্তু আমাদের চিন্তার যে আত্মপ্রকাশ তার আপনাতাই আপনার চরম—তার মূল্য তার আপনার মধ্যেই পর্যাগু। তমসাতীরে ক্রৌঞ্চ-বিরহিণীর চূড়ং কোন খানেই নেই কিন্তু আমাদের চিন্তার আত্মানুভূতির মধ্যে সেই বেদনার তার বাঁধা হয়েই আছে—সে ঘটনা এখন ঘটছে না, বা সে ঘটনা কোনো কালেই ঘটে নি এ কথা তার কাছে প্রমাণ করে কোনো লাভ নেই।

যাহোক, দেখা যাচ্ছে, গানের স্পন্দন আমাদের চিন্তার মধ্যে যে আবেগ জন্মিয়ে দেয়, সে কোনো সাংসারিক ঘটনামূলক আবেগ নয়। তাই মনে হয় সৃষ্টির গভীরতার মধ্যে যে-একটি বিশ্বব্যাপী প্রাণকম্পন চলতে গান শুনে সেইটেরই বেদনাবেগ যেন আমরা চিন্তার মধ্যে অনুভব করি। ভৈরবী যেন সমস্ত সৃষ্টির অন্তরতম বিরহব্যাকুলতা,

দেশমঞ্জার যেন অশ্রুগঙ্গোত্রীর কোন্ আদি নিব্বারের কলকলোল। এতে করে আমাদের চেতনা দেশকালের সীমা পার হয়ে নিজের চঞ্চল প্রাণধারাকে বিরাটের মধ্যে উপলব্ধি করে।

কাব্যেও আমরা আমাদের চিন্তার এই আত্মানুভূতিকে বিশুদ্ধ এবং মুক্তভাবে অথচ বিচিত্র আকারে পেতে চাই। কিন্তু কাব্যের প্রধান উপকরণ হল কথা। সেত সুরের মত স্বপ্রকাশ নয়। কথা অর্থকে জানাচ্ছে। অতএব কাব্যে এই অর্থকে নিয়ে কারবার করতেই হবে। তাই গোড়ায় দরকার এই অর্থটা যেন রসমূলক হয়। অর্থাৎ সেটা এমন কিছু হয় যা স্বতই আমাদের মনে স্পন্দন সঞ্চার করে, যাকে আমরা বলি আবেগ।

কিন্তু যে হেতু কথা জিনিসটা স্বপ্রকাশ নয় এই জন্মে সুরের মত কথাব সঙ্গে আমাদের চিন্তার সাধর্ম্য নেই। আমাদের চিন্তা বেগবান, কিন্তু কথা স্থির। এ প্রবন্ধের আরম্ভেই আমরা এই বিষয়টার আলোচনা করেছি। বলেছি, কথাকে বেগ দিয়ে আমাদের চিন্তার সামগ্রী করে তোলবার জন্মে ছন্দের দরকার। এই ছন্দের বাহনযোগে কথা কেবল যে দ্রুত আমাদের চিন্তে প্রবেশ করে তা নয়, তার স্পন্দনে নিজের স্পন্দন যোগ করে দেয়।

এই স্পন্দনের যোগে শব্দের অর্থ যে কি অপরূপতা লাভ করে তা আগে থাকতে হিসাব করে বলা যায় না। সেই জন্মে কাব্যরচনা একটা বিশ্বাসের ব্যাপার। তার বিষয়টা কবির মনে বাঁধা, কিন্তু কাব্যের লক্ষ্য হচ্ছে বিষয়কে অতিক্রম করা; সেই বিষয়ের চেয়ে বেশিটুকুই হচ্ছে অনির্বচনীয়। ছন্দের গতি কথার মধ্য থেকে সেই অনির্বচনীয়কে জাগিয়ে তোলে।

“রজনী সাঙন ঘন, ঘন দেয়া-গরজন,

রিমিঝিমি শব্দে বরিষে।

পালঙ্কে শয়ান রঙ্গে বিগলিত চীর অঙ্গে

নিন্দ যাই মনের হরিষে।”

বাদলার রাত্রে একটি মেয়ে বিছানায় শুয়ে ঘুমচ্ছে বিষয়টা এইমাত্র, কিন্তু ছন্দ এই বিষয়টিকে আমাদের মনে কাঁপিয়ে তুলতেই এই মেয়ের ঘুমোনো ব্যাপারটি যেন নিত্যকালকে আশ্রয় করে একটি পরম ব্যাপার হয়ে উঠল—এমন কি, জর্মন কাইজার আজ যে চার বছর ধরে এমন দুর্দান্ত শ্রুতাপে লড়াই করচে সেও এর তুলনায় তুচ্ছ এবং অনিত্য। ঐ লড়াইয়ের তথাটাকে এক দিন বহুকক্ষে ইতিহাসের বই থেকে মুখস্থ করে ছেলেদের একজামিন পাস করতে হবে—কিন্তু পালঙ্কে শয়ান রঙ্গে বিগলিত চীর অঙ্গে নিন্দ যাই মনের হরিষে—এ পড়া-মুখস্থ করার জিনিস নয়। এ আমরা আপনার প্রশ্নের মধ্যে দেখতে পাব, এবং যা দেখব সেটা একটি মেয়ের বিছানায় শুয়ে ঘুমোনের চেয়ে অনেক বেশি। এই কথাটাকেই আরেক ছন্দে লিখলে বিষয়টা ঠিকই থাকবে কিন্তু বিষয়ের চেয়ে বেশি যেটা, তার অনেকখানি বদল হবে।

শ্রাবণ মেঘে তিমির-ঘন শর্ববরী,

বরিষে জল কাননতল মঙ্গরি’ ॥

জলদরব-ঝঙ্কারিত ঝঙ্কারে

বিজন ঘরে ছিলাম স্নুখ-তন্দ্রাতে,

অলস মম শিখিল তনু-বল্পরী।

মুখর শিখী শিখরে ফিরে সঙ্গরি ॥

এই ছন্দে হয়ত বাইরের ঝড়ের দোলা কিছু আছে কিন্তু মেয়েটির ভিতরের গভীর কথা ফুটল না। এ আর-এক জিনিস হল।

ছন্দ কবিতার বিষয়টির চারদিকে আবর্তন করচে। পাঁতা যেমন গাছের ডাঁটার চারদিকে ঘুরে ঘুরে ভাল রেখে ওঠে এও সেই রকম। গাছের বস্তু-পদার্থ তার ডালের মধ্যে গুঁড়ির মধ্যে মজ্জাগত হয়ে রয়েছে, কিন্তু তার লাবণ্য, তার চাঞ্চল্য, বাতাসের সঙ্গে তার আলাপ, আকাশের সঙ্গে তার চাঁউনির বদল এসমস্ত প্রধানত তার পাতার ছন্দে।

পৃথিবীর আর্থিক এবং বার্ষিক গতির মত কাব্যে ছন্দের আবর্তনের দুটি অঙ্গ আছে, একটি বড় গতি আর একটি ছোট গতি। অর্থাৎ চাল এবং চলন। প্রদক্ষিণ এবং পদক্ষেপ। দৃষ্টান্ত দেখাই।

“শারদচন্দ্র পবন মন্দ বিপিন ভরল কুসুম গন্ধ”

এরই প্রত্যেকটি হল চলন। এমন আটটি চলনে এই ছন্দের চাল মারা হচ্ছে। অর্থাৎ ছয়ের মাত্রায় এ পা ফেলচে এবং আটের মাত্রায় ঘুরে আসচে। “শারদ চন্দ্র” এই কথাটি ছয় মাত্রার, “শারদ” তিন এবং “চন্দ্র”ও তিন। বলা বাহুল্য, যুক্ত অক্ষরে ছুই অক্ষরের মাত্রা আছে, এই কারণে “শারদ চন্দ্র” এবং “বিপিন ভরল” ওজনে একই।

১ শারদ চন্দ্র ২ পবন মন্দ, ৩ বিপিন ভরল ৪ কুসুম গন্ধ,

৫ ফুল্ল মল্লি, ৬ মালতি যুথি, ৭ মন্ত মধুপ ৮ ভোরগী।

প্রদক্ষিণের মাত্রার চেয়ে পদক্ষেপের মাত্রার পরেই ছন্দের বিশেষত্ব বেশি নির্ভর করচে। কেননা এই আট পদক্ষেপের আবর্তন সকল ছন্দেই চলে। বস্তুত এইটেই হচ্ছে অধিকাংশ ছন্দের চলিত কায়দা। যথা,

১ ২ ৩ ৪
মহাভার- তের কথা অমৃত স- মান
৫ ৬ ৭ ৮
কাশিরাম দাস কহে শুনে পুণ্য- বান।

এও আট পদক্ষেপ।

১ ২ ৩ ৪
(To) night the winds be- gin to rise
৫ ৬ ৭ ৮
(And) roar from yonder dropping day

এই কবিতার প্রদক্ষিণের মাত্রাভাগও আট, আবার

১ ২ ৩ ৪
When we two parted in silence and tears
৫ ৬ ৭ ৮
Half broken hearted to sever for years

এ কবিতারও তাই। কিন্তু কানে শোন্‌নামাত্রই বোঝা যায় এরা ভিন্ন জাতের ছন্দ।

এই জাত নির্ণয় করতে হলে চালের দিকে ততটা নয় কিন্তু চলনের দিকেই দৃষ্টি দিতে হবে। দিলে দেখা যাবে, ছন্দকে মোটের উপর তিন জাতে ভাগ করা যায়। সম-চলনের ছন্দ, অসম-চলনের ছন্দ এবং বিষম-চলনের ছন্দ। দুই মাত্রার চলনকে বলি সম-মাত্রার চলন, তিন মাত্রার চলনকে বলি অসম মাত্রার চলন এবং দুই তিনের মিলিত মাত্রার চলনকে বলি বিষম মাত্রার ছন্দ।

ফিরে ফিরে আঁখি নীরে পিছু পানে চায়।
পায়ে পায়ে বাধা পড়ে চলা হল দায়।

এ হল দুই মাত্রার চলন। দুইয়ের গুণফল চার বা আটকেও আমরা এক জাতিরই গণ্য করি।

নয়ন ধারায় পথ সে হারায়, চায় সে পিছন পানে,
চলিতে চলিতে চরণ চলে না, ব্যথার বিষম টানে।

এ হল তিন মাত্রার চলন। আর

যতই চলে চোখের জলে নয়ন ভরে ওঠে,
চরণ বাধে, পরাণ কাঁদে, পিছনে মন ছোটে।

এ হল দুই তিনের যোগে বিষম মাত্রার ছন্দ।

তা হলেই দেখতে পাওয়া যাচ্ছে চলনের ভেদেই ছন্দের প্রকৃতি-ভেদ। আমরা যে-দুটি ইংরেজি কবিতা উপরে উদ্ধৃত করেছি—তার মধ্যে একটার চলন সমমাত্রার অর্থাৎ দুই মাত্রার—অষ্টটার চলন অসম মাত্রার অর্থাৎ তিন মাত্রার—তাল দিয়ে গুণে দেখলেই সেটা ধরা পড়বে। ইংরেজিতে বিষম মাত্রার ছন্দ আমার চোখে পড়ে নি।

বৈষ্ণব পদাবলীতে বাংলা সাহিত্যে ছন্দের প্রথম টেউ ওঠে। কিন্তু দেখা যায় তার লীলাবৈচিত্র্য সংস্কৃত ছন্দের দীর্ঘ ক্রম মাত্রা অবলম্বন করেই প্রধানত প্রকাশ পেয়েছে। প্রাকৃত বাংলায় যত কবিতা আছে তার ছন্দ সংখ্যা বেশি নয়। সম মাত্রার ছন্দের দৃষ্টান্ত :-

কেন তোরে আনমন দেখি।

কাহ্নে নখে ক্ষিত্তিতল লেখি।

এ ছাড়া পয়ার এবং ত্রিপদী আছে—সেও সম মাত্রার ছন্দ।
অসম মাত্রার অর্থাৎ তিনের ছন্দ চার রকমের পাওয়া যায়—

- ১। মলিন বদন ভেল,
ধীরে ধীরে চলি গেল।
আওল রাইর পাশ।
কি কহিব জ্ঞান দাস।
- ২। জাগিয়া জাগিয়া হইল খীন
অসিত চাঁদের উদয় দিন ॥
- ৩। সদাই ধৈর্যানে চাহে মেঘপানে
না চলে নয়ন তারা।
বিরতি আহারে রাঙা বাস পরে
যেমত যোগিনী পারা।
- ৪। বেলি অবসান কালে
কবে গিয়াছিল জলে।

তাহারে দেখিয়া ইষত হাসিয়া ধরিলি সখীস্ন গলে ॥
বিষম মাত্রার দৃষ্টান্ত কেবল একটা চোখে পাড়েচে—সেও কেবল
গানের আরম্ভে—শেষ পর্য্যন্ত টেকে নি।

চিকনকালী গলায় মালা

বাজন নুপুর পায়।

চূড়ার কুলে ভ্রমর বুলে

তেরছ নয়নে চায় ॥

বাংলায় সম মাত্রার ছন্দের মধ্যে পয়ার এবং ত্রিপদীই সব চেয়ে
প্রচলিত। এই দুটি ছন্দের বিশেষত্ব হচ্ছে এই যে এদের চলন খুব
লম্বা। এদের প্রত্যেক পদক্ষেপে আট মাত্রা। এই আট মাত্রার
মোট ওজন রেখে পাঠক এর মাত্রাগুলিকে অনেকটা ইচ্ছামত চলা-
চালি করতে পারেন।

“পাষণ মিলায়ে যায় গায়ের বাতাসে।”

এর মধ্যে যে কতটা ফাঁক আছে তা যুক্তাক্ষর বসালেই টের
পাওয়া যায়।

“পাষণ মুচ্ছিয়া যায় গায়ের বাতাসে।”

ভারি হল না।

“পাষণ মুচ্ছিয়া যায় অঙ্গের বাতাসে।”

এতেও বিশেষ ভিড় বাড়ল না।

“পাষণ মুচ্ছিয়া যায় অঙ্গের উচ্ছাসে।”

এও বেশ সহ হয়।

“সঙ্গীত তরঙ্গ উঠে অঙ্গের উচ্ছাসে।”

এতেও অত্যন্ত ঠেসাঠেসি হল না।

“সঙ্গীত তরঙ্গ রঙ্গ অঙ্গের উচ্ছাস।”

অনুপ্রাসের ভিড় হল বটে কিন্তু এখনো অন্ধকূপ হত্যা হবার মত
হয় নি। কিন্তু এর বেশি আর সাহস হয় না। তবু যদি আরো
প্যাসেঞ্জার নেওয়া যায় তাহলে যে একেবারে পয়ারের নৌকাভূবি
হবে তা নয়, তবে কিনা হাঁপ ধরবে—যথা,

দুর্দান্ত পাণ্ডিত্যপূর্ণ ছুঃসাধ্য সিদ্ধান্ত।

কিন্তু দুই মাত্রার ছন্দ মাত্রেরই যে এই রকম অসাধারণ শোষণ-শক্তি তা বলতে পারি নে। যেখানে পদক্ষেপ ঘন ঘন সেখানে ঠিক উঠে। যথা—

২ ২ ২ ২ ২ ২ ২
ধরণীর আঁখিনীর মোচনের ছলে,

২ ২ ২ ২ ২ ২ ২
দেবতার অবতার বহুধার তলে।

এও পয়ার কিন্তু যেহেতু এর পদক্ষেপ আটে নয়, দুইয়ে, সেইজন্মে এর উপরে বোঝা যায় না। যে দ্রুত চলে থাকে হাক্কা হতে হয়। যদি লেখা যায়,

ধরিত্রীর চক্ষুণীর মুঞ্চনের ছলে,
কংসারির শঙ্খ-রব সংসারের তলে—

তাহলে ও একটা স্বতন্ত্র ছন্দ হয়ে যায়। সংস্কৃতের দেখ, সম মাত্রার ছন্দ যেখানে দুয়ের লয়ে চলে সেখানে দৌড় বেশি—যেমন—

২ ২ ২ ২ ২ ২ ২
হরি রিহ বিহরতি সরস বসন্তে।

ইংরেজিতেও তাই—

Ah dis- | tinctly | I re- | member |

It was | in the | bleak De- | cember |

বাংলা পয়ারের মত এদের গন্তীর মন্তর চলন নয়। কিন্তু এই ইংরেজিতে দুইয়ের চলনের বদলে চারের চলন যেখানে আসে সেখানে কেবল যে মন্তরতা, তা নয়, ছন্দের স্বাধীনতা বাড়ে। যেমন—

১ ২ ৩ ৪ ১ ২ ৩ ৪ ১ ২
(O) Goddess, hear these | tuneless numbers, | wrung

১ ২ ৩ ৪ ১ ২ ৩ ৪ ১ ২
(By) sweet enforcement | and remembrance | dear, |

এই খানে বলা আংশক wrung এবং dear শব্দকে দুই মাত্রা বলে গণ্য করেছি, তার কারণ উচ্চারিত syllable এর এক মাত্রার সঙ্গে বিরামের এক মাত্রা যোগ না করলে ছন্দ সম্পূর্ণ হয় না।

অসম অর্থাৎ তিন মাত্রার চলনও দ্রুত।

পাষণ মিলায় গায়ের বাতাসে—

এর লয়টা ছরস্তু। পড়লেই বোঝা যায় এর প্রত্যেক তিন মাত্রা পরবর্তী তিন মাত্রাকে চাচ্ছে, কিছুতে তার সঙ্গে না। তিনের মাত্রাটা টলটলে—গড়িয়ে বাবার দিকে তার বোঁক। এইজন্মে তিনকে গুণ করে ছয় বা বারো করলেও তার চাপল্য ঘোচে না। দুই মাত্রার চলন ক্ষিপ্ৰ, তিন মাত্রার চঞ্চল, চার মাত্রার মন্তর, আট মাত্রার গন্তীর। তিন মাত্রার ছন্দে যে পয়ারের মত ফাঁক নেই তা যুক্তাক্ষর জুড়তে গেলেই ধরা পড়বে। যথা—

গিরির গুহায় বরিছে নিব্বর

এই পদটিকে যদি লেখা যায়

পর্কিত কন্দরে বরিছে নিব্বর

তাহলে ছন্দের পক্ষে সাংঘাতিক হয়। অথচ পয়ারে

গিরি গুহাতল বেয়ে বারিছে নিব্বার

এবং

পর্বত কন্দর তলে বারিছে নিব্বার

ছন্দের পক্ষে দুইই সমান।

বিষম মাত্রার ছন্দের স্বভাব হচ্ছে তার প্রত্যেক পদে এক অংশে গতি, আর এক অংশে বাধা। এই গতি এবং বাধার সম্মিলনে তার মৃত্যু।

“অহহ কল- য়ামি বল- য়াদি মণি ভূষণং
হরি বিরহ দহন বহ- নেন বহ দুষণং।”

তিন মাত্রার “অহহ” যে ছাঁদে চলবার জন্মে বেগ সঞ্চয় করলে, দুই মাত্রার “কল” তাকে হঠাৎ টেনে থামিয়ে দিলে—আবার পরক্ষণেই তিন যেই নিজমূর্ত্তি ধরলে অমনি আবার দুই এসে তার লাগামে টান দিলে। এই বাধা যদি সত্যকার বাধা হত, তাহলে ছন্দই হত না—এ কেবল বাধার ছল, এতে গতিকের আরো উৎকর্ষ দেয় এবং বিচিত্র করে তোলে। এইজন্মে অল্প ছন্দের চেয়ে বিষম মাত্রার ছন্দে গতিকের আরো বেশি অনুভব করা যায়।

যাই হোক আমার বক্তব্য এই, ছন্দের পরিচয়ের মূলে দুটি প্রশ্ন আছে। এক হচ্ছে তার প্রত্যেক পদক্ষেপে ক’টি করে মাত্রা আছে। দুই হচ্ছে, সে মাত্রা সম, অসম, না বিষম অথবা সম-বিষমের যোগ। আমরা যখন মোটা করে বলে থাকি যে, এটা চোদ্দ মাত্রার ছন্দ, বা ওটা দশ মাত্রার তখন আসল কথাটাই বলা হয় না। তার কারণ পূর্বেই বলেছি চাল অর্থাৎ প্রদক্ষিণের মাত্রায় ছন্দকে চেনা

যায় না—চলন অর্থাৎ পদক্ষেপের মাত্রায় তার পরিচয়। চোদ্দ মাত্রায় শুধু যে পয়ার হয় না, আরো অনেক ছন্দ হয় তার দৃষ্টান্ত দেওয়া যাক।

বসন্ত পাঠায় দূত রহিয়া রহিয়া,

যে কাল গিয়েছে তারি নিখাস বহিয়া।

এই ত পয়ার—এর প্রত্যেক প্রদক্ষিণে দুটি পদক্ষেপ। প্রথম পদক্ষেপে আটটি উচ্চারিত মাত্রা, দ্বিতীয় পদক্ষেপে ছয়টি উচ্চারিত মাত্রা এবং দুটি অনুচ্চারিত অর্থাৎ যতির মাত্রা। অর্থাৎ প্রত্যেক প্রদক্ষিণে মোটের উপর উচ্চারিত মাত্রা চোদ্দ। আমরা পয়ারের পরিচয় দেওয়ার কালে প্রত্যেক প্রদক্ষিণের উচ্চারিত মাত্রার সমষ্টির হিসাব দিয়ে থাকি। তার প্রধান কারণ, কিছুকাল পূর্বে পয়ার ছাড়া চোদ্দ মাত্রা-সমষ্টির ছন্দ আমাদের ব্যবহারে লাগত না। নিম্নলিখিত চোদ্দ মাত্রার ছন্দেও ঠিক পয়ারের মতই প্রত্যেক প্রদক্ষিণে দুটি করে পদক্ষেপ :—

ফাগুন এল দ্বারে কেহ যে ঘরে নাই,

পরাণ ডাকে কারে ভাবিয়া নাহি পাই।

অথচ এটা মোটেই পয়ার নয়। তফাৎ হল কিসে যাচাই করে দেখলে দেখা যাবে যে এর প্রতি পদক্ষেপে আটের বদলে সাত উচ্চারিত মাত্রা। আর অনুচ্চারিত মাত্রা প্রতি পদক্ষেপের শেষে একটি করে দেওয়া যেতে পারে—যেমন,

“ফাগুন এল দ্বারে-এ কেহ যে ঘরে না-আই।” কিম্বা কেবল শেষ ছন্দে একটি দেওয়া যেতে পারে, যেমন, “ফাগুন এল দ্বারে কেহ যে ঘরে না-আই।” কিম্বা যতি একেবারেই না দেওয়া যেতে পারে।

পুনশ্চ এই ছন্দেই মাত্রাসমষ্টি সমান রেখে এরই পদক্ষেপ-
মাত্রার পরিবর্তন করে যদি পড়া যায় তাহলে শ্লোকটি চোখে দেখতে
একই রকম থাকবে কিন্তু কানে শুনে অস্থির রকম হবে। এই খানে
বলে রাখি, ছন্দের প্রত্যেক ভাগে একটা করে তালি দিলে পড়বার
সুবিধা হবে এবং এই তালি অনুসারে ভিন্ন ছন্দের ভিন্ন লয় ধরা
পড়বে। প্রথমে সাত মাত্রাকে তিন এবং চারের স্বতন্ত্র ভাগ করে
পড়া যাক—যেমন,

তালি	তালি	তালি	তালি
ফাঁগুন	এল ঘারে	কেহ যে	ঘরে নাই,
পরায়ণ	ডাকে কারে	ভাবিয়া	নাই পাই।

তারপরে পাঁচ দুই ভাগ করা যাক যেমন,—

তালি	তালি	তালি	তালি
ফাঁগুন	এল ঘারে	কেহ যে	ঘরে নাই,
পরায়ণ	ডাকে কারে	ভাবিয়া	নাই পাই।

এই চোদ্দ মাত্রাসমষ্টির ছন্দ আরো কত রকম হতে পারে তার
কতকগুলি নমুনা দেওয়া যাক :—দুই পাঁচ দুই পাঁচ ভাগের ছন্দ—
যথা—

সে যে	আপন মনে	শুধু	দিবস গণে *
তার	চোখের বারি	কাঁপে	আঁধির কোণে।

চার তিন চার তিন ভাগ—

নয়নের	সলিলে	যে কথাটি	বলিলে
রবে তাহা	স্মরণে	জীবনে	ও মরণে।

* এই প্রত্যেক দণ্ডটির অনুসরণ করে তাল দেওয়া আবশ্যিক।

কিষ্কা এক ছয় এক ছয় ভাগ—

।	।	।	।
যে	কথা নাহি	শোনে	সে থাক্ নিজমনে
কে	বৃথা নিবেদনে	রে	ফিরে তার সনে।

সাত চার তিনের ভাগ—

।	।	।	।
চাহিছ	বারে বারে	আপনারে	ঢাকিতে,
মন না	মানে মানা	মেলে ডানা	আঁধিতে।

এই কবিতাটাকেই অস্থির লয়ে পড়া যায়—

।	।	।	।
চাহিছ	বারে বারে	আপনারে	ঢাকিতে,
মন না	মানে মানা	মেলে ডানা	আঁধিতে।

তিন তিন তিন তিন দুইয়ের ভাগ—

।	।	।	।	।
ব্যাকুল	বকুল	ঝরিল	পড়িল	ঘাসে,
বাতাস	উদাস	আমের	বোলের	বাসে।

একই ছয় আটের ভাগে পড়া যায়—

।	।	।
ব্যাকুল	বকুল	ঝরিল পড়িল ঘাসে।
বাতাস	উদাস	আমের বোলের বাসে ॥

পাঁচ চার পাঁচের ভাগ—

।	।	।
নারবে	গেলে	মান-মুখে
কাঁদিলে	দুখে	মোর বুকে
		না-বলা বাণী।

এই শ্লোককেই তিন ছয় পাঁচ ভাগ করা যায়—

। নীরবে । গেলে স্নান-মুখে । জাঁচল টানি ।
। কাঁদিছে । ভুখে ঘোর বুক । না-বলা বাণী ।

এর থেকে এই বোঝা যাচ্ছে, প্রদক্ষিণের সমাপ্তি মাত্রা চোদ্দ হলেও সেই সমাপ্তির অংশের হিসাব কে কি ভাবে নিকাস করতে তারই উপর ছন্দের প্রভেদ ধরা পড়ে। কেবল ছন্দ-রসায়নে নয়, বস্তু-রসায়নেও এইরকম উপাদানের মাত্রাভাগ নিয়েই বস্তুর প্রকৃতি-ভেদ ঘটে রাসায়নিকেরা বোধ করি এই কথা বলেন।

পয়ার ছন্দের বিশেষত্ব হচ্ছে এই যে, তাকে প্রায় গাঁঠে গাঁঠে ভাগ করা চলে, এবং প্রত্যেক ভাগেই মূল ছন্দের একটা আংশিক রূপ দেখা যায়। যথা,—

ওহে পান্থ, চল পথে, পথে বন্ধু আছে
একা বসে স্নান-মুখে, সে যে সঙ্গ যাচে।

“ওহে পান্থ”—এইখানে একটা থামবার স্টেশন মেলে। তার পরে যথাক্রমে, “ওহে পান্থ চল”,—“ওহে পান্থ চল পথে”, “ওহে পান্থ চল পথে পথে।” তার পরে “বন্ধু আছে” এই ভগ্নাংশটার সঙ্গে পরের সাইন জোড়া যায়—যেমন, “বন্ধু আছে একা”, “বন্ধু আছে একা বসে”, “বন্ধু আছে একা বসে সে যে।” কিন্তু তিনের ছন্দকে তার ভাগে ভাগে পাওয়া যায় না, এই জগ্জে তিনের ছন্দে ইচ্ছামত থামা চলে না। যেমন, “নিশি দিল ডুব অরুণ সাগরে।” “নিশি দিল”, এখানে থামা যায়—কিন্তু তাহলে তিনের ছন্দ ভেঙে যায়—“নিশি দিল ডুব” পর্য্যন্ত এসে ছয় মাত্রা পুরিয়ে দিয়ে তবই তিনের ছন্দ হাঁক ছাড়তে পারে।

কিন্তু আবার, “নিশি দিল ডুব অরুণ” এখানেও থামা যায় না, কেননা, তিন এমন একটি মাত্রা, যা আর একটা তিনকে পেলে তবে দাঁড়াতে পারে, নইলে টলে’ পড়তে চায়—এই জগ্জ “অরুণ-সাগর”—এর মাঝখানে থামতে গেলে রসনা কুল পায় না। তিনের ছন্দে গতির প্রাবল্যই বেশি, স্থিতি কম। স্তবরাং তিনের ছন্দ চাক্ষুলা প্রকাশের পক্ষে ভাল কিন্তু তাতে গান্তীর্ঘ্য এবং প্রসারতা অল্প। তিনের মাত্রার ছন্দে অমিত্রাক্ষর রচনা করতে গেলে বিপদে পড়তে হয়—সে যেন চাকা নিয়ে লাঠি খেলার চেষ্টা। পয়ার আট পায়ের চলে বলে তাকে যে কত রকমে চালানো যায় মেঘনাদবধকাব্যে তার প্রমাণ আছে। তার অবতারগাটি পরখ করে’ দেখা যাক। এর প্রত্যেক ভাগে কবি ইচ্ছামত ছোট বড় নানা ওজনের নানা সুর বাজিয়েচেন; কোনো জায়গাতেই পয়ারকে তার প্রচলিত আভ্যায় এসে থামতে দেন নি। প্রথম আরম্ভেই বীরবাহুর বীরমর্যাদা স্নগস্তীর হ’য়ে বাজল—“সম্মুখ সমরে পড়ি বীরচূড়ামণি বীরবাহু” তার পরে তার অকাল মৃত্যুর সংবাদটি যেন ভাঙা রণ-পতাকা’র মত ভাঙা ছন্দে ভেঙে পড়ল—“চলি যবে গেলা যমপুরে অকালে”—তার পরে ছন্দ নত হয়ে নমস্কার করলে, “কহ হে দেবি অমৃত-ভাষিণি” তার পরে আসল কথাটা, যেটা সব চেয়ে বড় কথা—সমস্ত কাব্যের ঘোর পরিণামের যেটা সূচনা, সেটা যেন আসন্ন ঝটিকার স্তূর্দীর্ঘ মেঘ-গর্জনের মত এক দিগন্ত থেকে আর-এক দিগন্তে উদেঘাষিত হ’ল—“কোন্ বীরবরে বরি সেনাপতি-পদে পাঠাইলা রণে পুন রক্ষঃকুলনিধি রাঘবায়।”

বাংলা ভাষায় অধিকাংশ শব্দই দুই মাত্রার এবং তিন মাত্রার, এবং ত্রৈমাত্রিক শব্দের উপর বিভক্তি যোগে চার মাত্রার। পয়ারের পদ

বিভাগটি এমন যে, দুই, তিন এবং চার মাত্রার শব্দ তাতে সহজেই জায়গা পায়।

চৈত্রের সেতারে বাজে বসন্ত বাহার,
বাতাসে বাতাসে গুঠে তরঙ্গ তাহার।

এ পয়ারে তিন অক্ষরের ভিড়। আবার

চকমকি-ঠোকঠুকি-আগুনের প্রায়,
চোখোচোখি ঘটিতেই হাসি ঠিকরায়।

এই পয়ারে চারের প্রাধান্য।

ভারাগুলি সারারাতি কানে কানে কয়।

সেই কথা ফুলে ফুলে ফুটে বনময়।

এই খানে দুই মাত্রার আয়োজন।

প্রেমের অমরাবতী প্রেয়সীর প্রাণে,

কে সেথা দেবাধিপতি সে কথা কে জানে।

এই পয়ারে এক থেকে পাঁচ পর্য্যন্ত সকল রকম মাত্রারই সমাবেশ।
এর থেকে জানা যায় পয়ারের আতিথেয়তা খুব বেশি আর সেই জেতেই
বাংলা কাব্য সাহিত্যে প্রথম থেকেই পয়ারের এত অধিক চলন।

পয়ারের চেয়ে লম্বা দোঁড়ের সমমাত্রার ছন্দ আজকাল বাংলা-
কাব্যে চলচে। স্বপ্ন-প্রয়াণে এর প্রথম প্রবর্তন দেখা গেছে। স্বপ্ন-
প্রয়াণ থেকেই তার নমুনা তুলে দেখাই—

গন্তীর পাতাল, যেথা কালরাত্রি করাল বদন।
বিস্তারে একাধিপত্য। খসয়ে অমৃত ফণিকণা
দিবানিশি ফাটি' রোষে; যোর-নীল বিবর্ণ অনল

শিখা-সজ্জ আলোড়িয়া দাঁপাদাঁপি করে দেশময়
তমো-হস্ত এড়াইতে—প্রাণ যথা কালের কবল।

উচ্চারিত এবং অনুচ্চারিত মাত্রা নিয়ে পয়ার যেমন আট পদমাত্রায়
সমান দুই ভাগে বিভক্ত এ তা নয়। এর একভাগে উচ্চারিত মাত্রা
আট, অণুভাগে উচ্চারিত মাত্রা দশ। এই রকম অসমান ভাগে ছন্দের
গাণ্ডীর্ঘ্য বাড়ে। ছন্দে পদে পদে ঠিক সমান ওজন দাবি করা
কানের যেন একটা বাঁধা মোতান্তের মত দাঁড়ায়, সেইটি ভেঙে দিলে
ছন্দের গোরব আরো বাড়ে। ইংরেজি কাব্যে এর অনেক দৃষ্টান্ত
দেখতে পাই।

১ ২ ৩ ৪ ১ ২ ৩ ৪
(O) Wild West Wind, thou | breath of Autumn's

৫ ৬
being।

এর প্রথম ভাগে চার মাত্রা, দ্বিতীয় ভাগে যতিসমেত ছয় মাত্রা।
মিন্টনের

Hail holy light, ofspring of Heaven's first-born

এও এই ছন্দে। সংস্কৃত মন্দাক্রান্তার অসমান ভাগের গাণ্ডীর্ঘ্য
স্ববাই জানেন—

কশ্চিৎকাস্তা বিরহ গুরুণা স্বাধিকার প্রমত্তঃ

এর প্রথম ভাগে আট, দ্বিতীয় ভাগে সাত, তৃতীয় ভাগে সাত,
এবং চতুর্থ ভাগে চার মাত্রা। এমনতর ভাগে কানের কোনো সক্ষীর্ণ
অস্ত্যাস হবার জো নেই।

সমান মাত্রার। কিন্তু আসলে খার্ড-ক্লাসের আদর্শকে যদি একটা সরল রেখা বলে ধরে নিই তবে কোনো ছেলে সেই রেখার উপরে চড়ে কেউবা তার নীচে নামে। ভাল শিক্ষা প্রণালী তাকেই বলে যাতে প্রত্যেক ছেলেকে তার নিজের স্বতন্ত্র বুদ্ধি ও শক্তির মাত্রা অনুসারে ব্যবহার করা যায়—খার্ড-ক্লাসের একটা কাল্পনিক মাত্রা ক্লাসের সকল ছেলের উপরে সমান ভাবে আরোপ না করা যায়। কিন্তু কাজ সহজ করবার জন্ত বহু অসমানকে এক সমান কাঠগড়ায় বন্দী করবার নিয়ম আছে। সাধু বাংলার ছন্দে তারই প্রমাণ পাই। হলস্তই হোক হসস্তই হোক আর যুক্তবর্ণই হোক এই ছন্দে সকলেরই সমান মাত্রা।

অথচ প্রাকৃত বাংলার প্রকৃতি সমতল নয়। সংস্কৃতের নিয়মে না হোক নিজের নিয়মে তার একটা ঢেউ খেলা আছে। তার কথার সকল অংশ সমান ওজননের নয়। বস্তুতঃ পদেপদেই তার শব্দ বন্ধুর হয়ে ওঠে। তার কারণ, প্রাকৃত বাংলায় হসস্তের প্রাচুর্য্য খুব বেশি। এই হসস্তের দ্বারা ব্যঞ্জন বর্ণের মধ্যে সংঘাত জন্মাতে থাকে—সেই সংঘাতে ধ্বনি গুরু হয়ে ওঠে। প্রাকৃত বাংলার এই গুরুধ্বনির প্রতি যদি সন্যবহার করা যায় তাহলে ছন্দের সম্পদ বেড়ে যায়। প্রাকৃত বাংলার দৃষ্টান্ত

বৃষ্টি পড়ে টাপুর টুপুর নদেয় এল বান
শিবুঠাকুরের বিয়ে হবে তিন কণ্ঠে দান
এক কণ্ঠে রাঁধেন বাড়েন এক কণ্ঠে খান
এক কণ্ঠে না পেয়ে বাপের বাড়ি যান।

এই ছড়াটিতে দুটি জিনিস দেখবার আছে। এক হচ্ছে বিসর্গের ঘট-কালিতে ব্যঞ্জনের সঙ্গে ব্যঞ্জনের সঙ্গিন—আর এক হচ্ছে “বৃষ্টি” এবং

“কণ্ঠে” কথার যুক্ত বর্ণকে যথোচিত মর্যাদা দেওয়া। এই ছড়া সাধু বাংলার ছন্দে বাঁধলে পালিস করা আবুলুস কার্ঠের মত পিছল হয়ে ওঠে।

বারি ঝরে বার ঝর নদিয়ায় বান
শিবুঠাকুরের বিয়ে তিন মেয়ে দান।
এক মেয়ে রাঁধিছেন এক মেয়ে খান,
এক মেয়ে ক্ষুধাভরে পিতৃঘরে যান।

এতে যুক্ত বর্ণের সংযোগ হলেও ছন্দের উল্লাস তাতে বিশেষ বাড়ে না। যথা—

মন্দ মন্দ বৃষ্টি পড়ে, নবদীপে বান,
শিবুঠাকুরের বিয়া তিন কণ্ঠা দান।
এক কণ্ঠা রাঁধিছেন, এক কণ্ঠা খান,
এক কণ্ঠা উর্দ্ধ্বাসে পিতৃগৃহে যান।

এই সব যুক্ত বর্ণের যোগে এ ছন্দ বন্ধুর হয়ে উঠেচে বটে কিন্তু তরঙ্গিত হয় নি—কেন না যুক্ত বর্ণ যথেষ্টা ছড়ানো হয়েছে মাত্র, তাদের মর্যাদা অনুসারে জায়গা দেওয়া হয়নি। অর্থাৎ হাটের মধ্যে ছোটর বড়র যেমন গায়ে গায়ে ভিড় করে তেমনি, সভার মধ্যে যেমন তারা যথাযোগ্য আসন পায় তেমন নয়।

ছন্দঃকুসুম বইটির লেখক প্রাকৃত বাংলার ছন্দ সম্বন্ধে অনুষ্ঠিত ছন্দে বিলাপ করে বলছেন—

পাঁচালী নাম বিখ্যাতা, সাধারণ মনোরমা
পয়ার ত্রিপদী আদি প্রাকৃতে হয় চালনা।

দ্বিপাদে শ্লোক সম্পূর্ণ তুল্য সংখ্যার অক্ষরে,
পাঠে ছুই পদে মাত্র শেখাঙ্কর সদা মিলে।
পঠনে সে সব ছন্দঃ রাখিতে ভাল গৌরব
পঠিছে সর্বদা লোকে উচ্চারণ-বিপর্যয়ে।
লঘুকে গুরু সম্ভাষে দীর্ঘবর্ণে কহে লঘু,
হ্রস্বে দীর্ঘে সমজ্ঞানে উচ্চারণ করে সবে।

কবির এই বিলাপের সঙ্গে আমিও যোগ দিচ্ছি। কেবল আমি
এই বলতে চাই প্রাকৃত বাংলার ছন্দে এমনতর ছুর্ঘটনা ঘটে না, এ সব
ঘটে সংস্কৃত বাংলার ছন্দে। প্রাকৃত বাংলার যে স্বকীয় দীর্ঘ-হ্রস্বতা
আছে তার ছন্দে তার বিপর্যয় দেখিনে কিন্তু সাধু ভাষায় দেখি।

এই প্রাকৃত বাংলা মেয়েদের ছড়ায় বাউলের গানে রামপ্রসাদের পদে
আপন স্বভাবে প্রকাশ পেয়েছে। কিন্তু সাধু সভায় তার সমাদর হয় নি
বলে সে মুখ ফুটে নিজের সব কথা বলতে পারে নি এবং তার শক্তি যে কত
তারও সম্পূর্ণ পরিচয় হল না। আজকের দিনের ডিমক্রেসির যুগেও সে
ভয়ে ভয়ে দ্বিধা করে চলেছে; কোথায় যে তার পংক্তি এবং কোথায় নয়
তা স্থির হয়নি। এই সন্দেহে তার আত্ম পরিচয়ের খর্ব্বতা হচ্ছে।
একদিন বাঙালীকে বলা হত বাঙালী কেরাণীগিরি করতে পারে, বিশুদ্ধ
বিশেষত অবিশুদ্ধ ইংরেজি লিখতে ও বলতে তার বাহাদুরী আছে কিন্তু সে
রাষ্ট্রশাসন কিম্বা যুদ্ধ করতে পারে না। এমন অবিশ্বাস ও সন্দেহের কথা
যত দিন বলা হবে, ততদিন আমাদের শক্তির প্রমাণ হবে না। প্রাকৃত
বাংলাকেও সেইরকম অবজ্ঞা ও অবিশ্বাসের উপর রাখা হয়েছে সেই
জগ্গে তার পূর্ণ পরিচয় হচ্ছে না। আমরা একটা কথা ভুলে যাই
প্রাকৃত বাংলার লক্ষ্মীর পেটুরায় সংস্কৃত, পারসী ইংরেজি প্রভৃতি নানা

ভাষা থেকেই শব্দ সংকল্প হচ্ছে—সেই জগ্গে শব্দের দৈন্য প্রাকৃত
বাংলার স্বভাবগত বলে মনে করা উচিত নয়। প্রয়োজন হলেই আমরা
প্রাকৃত ভাণ্ডারে সংস্কৃত শব্দের আমদানি করতে পারব। কাজেই
যেখানে অর্থের বা ধ্বনির প্রয়োজন বশত সংস্কৃত শব্দই সম্ভব সেখানে
প্রাকৃত বাংলায় তার বাধা নেই। আবার ফার্সি কথাও তার সঙ্গে সঙ্গেই
আমরা একসাথে বসিয়ে দিতে পারি। সাধু বাংলায় তার বিদ্রূপ আছে—
কেননা সেখানে জাতিরক্ষা করাকেই সাধুতীরক্ষা করা বলে। প্রাকৃত
ভাষার এই ঔর্ধ্ব্য গজ্জে পজ্জে আমাদের সাহিত্যের একটি পরম সম্পদ
এই কথা মনে রাখতে হবে।

শ্রীরবীন্দ্রনাথ ঠাকুর।

ফরমাসেসি-গম্প।

—:~:—

মকদমপুরের জমিদার রায় মহাশয় সন্ধ্যা-আত্মিক করে, সিকি ভরি অহিফেন সেবন করে, যখন বৈঠকখানায় এসে বসলেন, তখন রাত এক প্রহর। তিনি মসনদের উপর তাকিয়া হেলান দিয়ে বসে গুড়গুড়ির নল মুখে দিয়ে বিমতে লাগলেন। সভাস্থ ইয়ার-বস্ত্রির দল সব চূপ করে রইল; পাছে হজুরের বিমুনির ব্যাঘাত হয়, এই ভয়ে কেউ টুঁ-শব্দও করলে না। খানিকক্ষণ বাদে রায় মহাশয় হঠাৎ জেগে উঠে গা-ঝাড়া দিয়ে বসে প্রথম কথা বললেন—“ঘোষাল! গল্প বল”।

রায় মহাশয়ের মুখ থেকে এ কথা পড়তে না পড়তে তাঁর ডান-ধার থেকে একটি গৌরবর্ণ ছিপছিপে টেড়িকাটা যুবক, হাসি-মুখে চাঁচা গলায় উত্তর করলে—

ঘে-আজ্ঞে হজুর, বলছি।

—আজ কিসের গল্প বলবি বল ত ?

—বর্ধার গল্প হজুর।

—একে শ্রাবণ মাস, তায় আবার তেমনি মেঘ করেছে, তাই আজ ঘোষাল বর্ধার গল্প বলবে। ওর রসবোধটা খুব আছে। কি বলেন—পণ্ডিত মহাশয় ?

একটি অস্থি-চর্মসার দীর্ঘাকৃতি পুরুষ একটিপ নশ্ত নিয়ে সামু-নাসিক স্নরে উত্তর করলেন—

—তার আর সন্দেহ কি? তা না হলে কি মহাশয়ের মত গুণগ্রাহী লোক আর ওকে মাইনে করে চাকর রাখেন? তবে জিজ্ঞাস্য হচ্ছে এই যে, ঘোষাল আজ কি রসের অবতারণা করবে?

ঘোষাল তিলমাত্র দ্বিধা না করে বললে—

—মধুর রসের। বর্ধার রাস্তিরে আর কি রস ফোটানো যায়?

রায় মহাশয় জিজ্ঞাসা করলেন “কেন ভূতের গল্প চলবে না? কি বলেন শ্মৃতিরত্ন?”

—আজ্ঞে চলবে না কেন, তবে তেমন জমবে না। ভয়ানক রসের অবতারণা শীতের রাত্রেই প্রশস্ত।

ঘোষাল পণ্ডিত মহাশয়ের মুখের কথা কেড়ে নিয়ে বলে উঠল—

—এ লাখ কথার এক কথা। কেননা মানুষের বাইরেটা যখন শীতে কাঁপছে, তখনি তার ভিতরটা ভয়ে কাঁপানো সঙ্গত। এই দুই কাপুনিতে মিলে গেলে, গল্পের আর রসভঙ্গ হয় না।

পণ্ডিত মহাশয় এ কথা শুনে মহা-খুসি হয়ে বলেন—

—তা ত বটেই, তা ত বটেই! আর তা ছাড়া মধুর রসের মধ্যেই ত ভয়ানক প্রভৃতি সকল রসই বর্তমান, তাতেই না অলঙ্কার শাস্ত্রে ওর নাম—আদিরস।

রায় মহাশয়ের মুখ দিয়ে এতক্ষণ শুধু অম্বরিতামাকের ঘোঁয়ার একটি ক্ষীণ ধারা বেরছিল—এইবার আবার কথা বেরল—কিন্তু তার ধারা ক্ষীণ নয়—

—আপনার অলঙ্কার শাস্ত্রে যা বলে বলুক, তাতে কিছু যায় আসে না। আমার কথা হচ্ছে এই, আমি এখন বুড়ে হতে চল্লুম—বয়েস প্রায় পঞ্চাশ হ'ল। এ বয়েসে প্রেমের কথা কি আর ভাল লাগবে? ও সব গল্প যাও ছেলে-ছোকরাদের শোনাও গিয়ে।

উপস্থিত সকলেই জানতেন যে রায় মহাশয় তাঁর বয়েস থেকে তাঁর তৃতীয় পক্ষের সহধর্মিণীর বয়েস—অর্থাৎ ঝাড়া পোনোরো-বৎসর চুরি করেছেন, অতএব তাঁর কথার আর কেউ প্রতিবাদ করলেন না। শুধু ঘোষাল বললে—

—হজুর, ছেলে-ছোকরারা নিজেরা প্রেম করতে এত ব্যস্ত যে প্রেমের গল্প শোনার তাদের ফুরসৎ নেই। তা ছাড়া আদিরসের কথা শোনায় ছেলেদের নীতি খারাপ হয়ে যেতে পারে—হজুরের ত আর সে ভয় নেই!

—দেখেছেন পণ্ডিত মশায়, ঘোষাল কেমন হিসেবি লোক! যাই বলুন, কার কাছে কোন কথা বলতে হয়, তা ও জানে।

—সে কথা আর বলতে? শাস্ত্রে বলে ঘোঁষনে যার মনে বৈরাগ্য আসে সেই যথার্থই বিরক্ত, আর বৃদ্ধ বয়সেও যার মনে রস থাকে সেই যথার্থ রসিক। ঘোষাল কি আর না বুকে স্তব্ধে কথা কয়? ও জানে আপনার প্রাণে এ বয়েসেও যে রস আছে, এ কালের যুবাদের মধ্যে হাজারে এক জনেরও তা নেই।

—ঠিক বলেছেন পণ্ডিত মশায়। আমি সেদিন যখন সেই ভৈরবীর টপ্পাটা পাইলুম, হজুর শুনে কত বাহবা দিলেন; আর সেই গানটাই একটা পয়লা-নশ্বরের M. A.-এর কাছে গাওয়াতে সে ভদ্রলোক কানে হাত দিলে। বললে অগ্নীল।

—কোন গানটা রে ঘোষাল?

—“গৌরী তুনে নয়না লাগাওয়ে যাদুডারা—”

—কি বলছিস ঘোষাল, ঐ গান শুনে ইফ্টুপিট কানে হাত দিলে? অমন কান মলে দিতে পারলি নে? হতভাগাদের যেমন ধর্মস্জ্ঞান তেমনি রসজ্ঞান। ইংরেজি পড়ে জাতটে একেবারে অধঃপাতে গেল!

এই কথা শুনে সে সভার সব চাইতে ফর্টপুফ্ট ও খর্ব্বাকৃতি ব্যক্তিটি অতি মিহি অথচ তীব্র গলায় এই মত প্রকাশ করলেন যে—

—অধঃপাতে গিয়েছিল বটে, কিন্তু এখন আবার উঠছে।

—তুমি আবার কি তব্ব বার করলে হে উজ্জ্বল নীলমণি?—

রায় মহাশয় ঘাঁকে মশোধান করে এ প্রশ্ন করলেন, তাঁর নাম নীলমণি গোস্বামী। ঘোষাল তার পিছন থেকে গোস্বামীটি কেটে দিয়ে স্রুখে “উজ্জ্বল” শব্দটি জুড়ে দিয়েছিল। তার এক কারণ, গোস্বামী মহাশয়ের বর্ণ ছিল, উজ্জ্বল নয় বোরশ্চাম; আর এক কারণ, তিনি কথায় কথায় উজ্জ্বল-নীলমণির দোহাই দিতেন। এই নাম করণের পর সে রোগ তাঁর সেরে গিয়েছিল।

জমিদার মহাশয়ের প্রশ্নের উত্তরে গৌঁসাইজি বললেন—

—আজ্ঞে, ইংরাজিনবীশদের যে মতিগতি ফিরছে তা আমি জেনে শুনেই বলছি। আমারই জনকত পাসকরা শিষ্য আছে, যাদের কাছে ঘোষাল যদি ও গানটা না গেয়ে, গান ধরত

গেলি কামিনী গজবরগামিনী

বিহসি পালাটি নেহারি

তাহলে আমি হলপ করে বলতে পারি তারা ভাবে একেবারে বিভোর হয়ে যেত।

—ও দুয়ের তফাৎটা কোথায়?

—তফাৎটা কোথায়? বললেন ভাল পণ্ডিত মশায়! একটা টপ্পা আর একটা কীর্তন!

—অর্থাৎ তফাৎ যা তা নামে!

—অবাক করলেন! তাহলে শেরীমিয়ার সঙ্গে বিছাপতি ঠাকুরের প্রভেদও শুধু নামে। নামের ভেদেই ত বস্তুর ভেদ হয়। কিন্তু এ ক্ষেত্রে আসল প্রভেদ রসে। যাক আপনার সঙ্গে রসের বিচার করা বৃথা। রসজ্ঞান ত আর টোলে জন্মায় না।

—বটে! অমর শতক থেকে শুরু করে নৈষধের অষ্টাদশ সর্গ পর্যন্ত আলোচনা করে যদি রসজ্ঞান না জন্মায়—তাহলে মনু থেকে শুরু করে রঘুনন্দনের অষ্টাদশ তত্ত্ব পর্যন্ত আলোচনা করেও ধর্মজ্ঞান জন্মায় না।

—রাগ করবেন না পণ্ডিত মশায়, কিন্তু কথাটা এই যে, সংস্কৃত-কাব্যের রস আর পদাবলীর রস এক বস্তু নয়—ও দুয়ের আকাশ পাতাল প্রভেদ।

—আপনি ত দেখছি এক কথারই বার বার পুনরাবৃত্তি করছেন। মানলুম টপ্পা ও কীর্তন এক বস্তু নয়—কাব্যরস ও পদাবলীর রস এক বস্তু নয়। কিন্তু পার্থক্য যে কোথায়, তা ত আপনি দেখিয়ে দিতে পারছেন না।

—তফাৎ আছে বৈকি। যেমন তালের রস ও তাড়ি একবস্তু নয়—

একটায় নেশা হয়, আর একটায় হয় না। সংস্কৃত কবিতা পড়ে কেউ কখন ধুলোয় গড়াগড়ি দেয়?

ঘোষালের এ মন্তব্য শুনে মায় স্মৃতিরত্ন সভাসুদ্ধ লোক হেসে উঠল। উজ্জ্বল নীলমণি মহাক্রুদ্ধ হয়ে বললেন—

—পণ্ডিত মহাশয়, আপনিও এই সব ইয়ারকির প্রশয় দেন— আশ্চর্য্য! যেমন ঘোষালের বিচ্ছে তেমনি তার বুদ্ধি।

রায় মহাশয় ঘোষালকে চব্বিশঘণ্টা ধমকের উপরেই রাখতেন; কিন্তু তার বিরুদ্ধে অপর কাউকেও একটি কথা বলতে দিতেন না। “আমার পাঁঠা আমি লোজের দিকে কাটব, কিন্তু অপর কাউকে মুড়ির দিকেও কাটতে দেব না”—এই ছিল তাঁর motto. তিনি তাই একটু গরম হয়ে বললেন—

— কেন, ওর বুদ্ধির কমতিতে দেখলে কোথায় হে উজ্জ্বল নীলমণি! তোমাদের মত ওর পেটে বিচ্ছে না থাকতে পারে, কিন্তু মগজে ঢের বেশি বুদ্ধি আছে। তাগমাক্ষিক অমনি একটি যুতসই উপমা লাগাও দেখি!

—আজ্ঞে, ওর বুদ্ধি থাকতে পারে—কিন্তু রসজ্ঞান নেই।

—রসজ্ঞান ওর নেই, আর তোমার আছে? করো ত অমনি একটা রসিকতা!

—আজ্ঞে ঐ রসিকতাই প্রমাণ, ওর মনে ভক্তির নামগন্ধও নেই। যার ধর্মজ্ঞান নেই, তার আবার রসজ্ঞান!

স্মৃতিরত্ন এ কথা শুনে আর চুপ থাকতে পারলেন না। বললেন—

—এ আবার কি অদ্ভুত কথা? ঘোষালের ধর্মজ্ঞান না থাকতে পারে, তাই বলে কি ওর রসজ্ঞান থাকতে নেই?

—অবশ্য না! ও ছুইত আর পৃথক জ্ঞান নয়।

—আমাদের কাছে যা সামান্য, আপনার কাছে যখন তা বিশেষ, আমাদের কাছে যা বিশেষ আপনার কাছে তা অবশ্য সামান্য; এ এক নব্যস্থায় বটে।

—শুনুন পণ্ডিত মশায়! যার নাম রসজ্ঞান তারি নাম ধর্মজ্ঞান, আর যার নাম ধর্মজ্ঞান তারি নাম রসজ্ঞান। নামের প্রভেদে ত আর বস্তুর প্রভেদ হয় না।

—বলেন কি গোঁসাইজি! তাহলে আপনাদের মতে, যার নাম কাম তারি নাম ধর্ম, আর যার নাম অর্থ তারি নাম মোক্ষ?

—আসলে ও সবই এক। রূপান্তরে শুধু নামান্তর হয়েছে।

—বুঝছেন না পণ্ডিত মশায়, কথা খুব সোজা। গোঁসাইজি বলছেন কি যে, যার নাম ভাজা চাল তারি নাম মুড়ি—নামান্তরে শুধু রূপান্তর হয়েছে।

মদের পিঠ পিঠ এই চাটের উপমা আসায়, রায় মহাশয়ের পাত্র-মিত্রগণ মহা খুসি হয়ে অটহাস্তে ঘোষালের এ টিপ্পনির অন্তিমোদন করলেন। উজ্জ্বল নীলমণি এর প্রতিবাদ করতে উচ্চত হবামাত্র, তাঁর মাথার উপর থেকে একটা টিকটিকি বলে উঠল “ঠিক ঠিক ঠিক”। সঙ্গে সঙ্গে স্মৃতিরত্ন মহাশয়ের প্রস্ফুরিত ও বিস্ফারিত নাসিকারন্ধু হতে একটা প্রচণ্ড সহাস্ত হেঁচপনি নির্গত হয়ে, উজ্জ্বল নীলমণির বক্ষদেশ যুগপৎ হাস্ত ও নস্তরসে সিল্ক করে দিলে। তিনি অমনি “রাধামাধব” বলে সরে বসলেন। রায় মহাশয় এই সব ব্যাপার দেখে শুনে ভারি চটে বসলেন—

—তোমরা কটায় মিলে ভারি গণ্ডগোল বাধালে ত হে! আমি শুনতে চাইলুম গল্প আর এঁরা শুরু করে দিলেন তর্ক—আর সে তর্কের যদি কোনও মাথাযুগু থাকে। ঘোষাল! গল্প বল।

—হজুর, এই বল্লুম বলে।

—শীগগির, নইলে এরা আবার তর্ক জুড়ে দেবে। একি আমার শ্রীক্লেবের সভা যে, নাগাড় পণ্ডিতের বিচার চলবে?

উজ্জ্বল নীলমণি বললেন—

—আজ্ঞে, সে ভয় নেই। যে সভায় ঘোষাল বক্তা, সে সভায় যদি আমি আর মুখ খুলি ত আমার নামই নয়—

“ভদ্রং কৃতং কৃতং মোনং কোকিলঃ জলদাগমে।”

—পণ্ডিত মশায়ের বচনটি খাপে খাপে মিলে গিয়েছে। কাল যে বর্ষা, তা ত সকলেই জানেন। তার উপর গোঁসাইজির কোকিলের সঙ্গে যে এক বিষয়ে সাদৃশ্য, আছে সে ত প্রত্যক্ষ।

উজ্জ্বল নীলমণির গায়ে এই কথার নখ বসিয়ে দিয়ে ঘোষাল আরম্ভ করলে—

—তবে বলি শ্রবণ করুন।

—দেখ মধুর রসের বলে গল্প যেন একদম চিনির পানা করে তুলিস নে। একটু নুনঝাল যেন থাকে।

—হজুর যে অরুচিতে ভুগছেন, তাকি আর জানিনে?

—আর দেখু, একটু অলঙ্কার দিয়ে বলিস্—একেবারে যেন সাদা না হয়।

—অলঙ্কারের সখই যে আজকাল হজুরের প্রধান সখ, তা ত আর কারও জানতে বাকী নেই।

—কিন্তু সে অলঙ্কার যেন ধারকরা কিম্বা চুরিকরা না হয়।

—হুজুর, ভয় নেই। পরের সোনা এখানে কানে দেব না, তাহলে গোঁসাইজি তা হেঁচকাটানে কেড়ে নেবেন। কিন্তু এক্ষেত্রে নিজের জিনিস ব্যবহার করলে সবাই সোনাকে বল্বে পিতল, আর বড় অনুগ্রহ করে ত—গিণ্টি।

—অথ্যে যে যা বলে তা বলুক—কিন্তু আসল ও নকলের প্রভেদ আমার চোখে ঠিক ধরা পড়বে।

—হুজুর জহুরি, সেই ত ভরসা। তবে শুনুন—

শ্রাবণমাস, অমাবস্তার রাত্তির, তার উপর আবার তেমনি ছর্যোগ। চারদিক একেবারে অন্ধকারে ঠাসা। আকাশে যেন দেবতার আঁবলুশ কাঠের কপাট ভেঙিয়ে দিয়েছে,—আর তার ভিতর দিয়ে যা গলে পড়ছে তা জল নয়,—একদম আলকাতরা। আর তার এক একটা ফোঁটা কি মোটা, যেন তামাকের গুল—

—কাঠের কপাটের ভিতর দিয়ে জল কি করে গলে পড়বে বলত মূর্খ? যখন বর্ণনা শুরু করে দিস, তখন আর তোর সম্ভব অসম্ভবের জ্ঞান থাকে না। বল জল চুঁইয়ে পড়ছে!

—হুজুর বলতে চান আমি বস্তুতন্ত্রতার ধার ধারি নে। আজে তা নয়, আমি ঠিকই বলেছি। জল গলেই পড়ছে, চুঁইয়ে নয়। কপাট বাটে, কিন্তু—ফারফোরের কাজ, ভাষায় যাকে বলে জালির কাজ। সেই জালির ফুটো দিয়ে—

—দেখলেন স্মৃতিরত্ন, বোম্বালের ঠিকে ভুল হয় না।

এই শুনে দেওয়ানজি বললেন—

—দেখলে ঘোষাল! ঠিকে ভুল কর্তার চোখ এড়িয়ে যায় না।

—সে আর বল্বেতে। হুজুর হিসেব নিকেশে যদি অত পাকা না হতেন তা হলে তার বাড়িতে আর পাকা চণ্ডীমণ্ডপ হয়, আগে যার চালে খড় ছিল না।

—তুমি কার কথা বলছ হে,—আমার? —

—যে নল চালায় সে কি জানে কার ঘরে গিয়ে সে নল ঢুকবে? যাক ও সব কথা, এখন গল্প শুনুন।

এই ছর্যোগের সময় একটা ব্রাহ্মণের ছেলে, বহুস আন্দাজ পঁচিশ ছাঙ্গিণ, এক তেপান্তর মাঠের ভিতর এক বটগাছের তলায় একা পাড়িয়ে ঠায় ভিজছিল।

—কি বলি! ব্রাহ্মণের ছেলে রাত দুপুরে গাছতলায় দাঁড়িয়ে ভিজছে আর তুই ঘরের ভিতর বসে মনের স্তখে গল্প বলে যাচ্ছিস? ও হবে না ঘোষাল, ওকে ওখান থেকে উদ্ধার করতে হবে!

—হুজুর, অর্ধের্য্য হবেন না; উদ্ধার ত করবই। নইলে মধুর রসের গল্প হবে কি করে? কেউ ত আর নিজের সঙ্গে নিজে প্রেম করতে পারে না।

—তা ত জানি, কিন্তু তুই হয়ত এখানেই আর একটাকে এনে জোটাবি! গল্প শুরু করে দিলে তোর ত আর কাণ্ডাকাণ্ড জ্ঞান থাকে না।

—দেখুন রায় মহাশয়, ঘোষাল যদি তা করে, তাতেও অলঙ্কার শাস্ত্রের হিসেবে কোনও দোষ হয় না। সংস্কৃত কবিরায় ত অভিসারিকাদের এমনি ছর্যোগের মধ্যেই বার করতেন।

—দেখুন পণ্ডিত মহাশয়, সেকালে তাদের হাড় মজবুত ছিল,

একালের ছেলেমেয়েদের আধঘণ্টা জলে ভিজলে নির্ধাৎ pneumonia হবে। এ যে বাঙ্গলাদেশ, তায় আবার কলিকাল!

এ কথা শুনে উজ্জ্বলনীলমণি আর স্থির থাকতে পারলেন না, সবেগে বলে উঠলেন—

—তাতে কিছু যায় আসে না মশায়। পদাবলী পড়ে দেখবেন,— কি ঝড়জলের মধ্যে অভিসারিকারা ঘর থেকে বেরিয়ে পড়তেন, এবং তাতে করে তাঁদের কারও যে কখনো অপযয় ছু ঘটেছে, এ কথা কোনও পদাবলীতে বলে না। আসল কথাটা কি জানেন, মনের ভিতর যার আশুন্ড জ্বলছে, বাইরের জলে তার কি করবে?

—হজুর ত ঠিকই ভয় পেয়েছেন। অভিসারিকাদের চামড়া মোম-জামা হতে পারে, কিন্তু তাই বলে ব্রাহ্মণসন্তানকে জলে ভেজালে যে ব্রাহ্মহত্যা হবে না, কে বলতে পারে? অভিসারক বলে ত আর কোনও জানোয়ার নেই। দেখুন হজুর, ব্রাহ্মণের ছেলে ভিজছিল বটে, কিন্তু তার গায়ে জল লাগছিল না। তার মাথায় ছিল ছাতা, গায়ে বর্ষাতি, আর পায়ে বুট জুতো। তার পর শুনুন—

শুধু ঝড়জল নয়। মাথার উপর বজ্র ধমকাছিল আর চোখের স্নুমুখে বিগ্নাৎ চমকাছিল। সে এক তুমুল ব্যাপার। লাখে লাখে তুবড়ি ছুটছে, ঝাঁকে ঝাঁকে হাটাই উড়ছে, তারি ঝাঁকে ঝাঁকে বোমা ফুটছে—সেদিন স্বর্গে হাছিল দেওয়ালি।

—কি বললি ঘোষাল, শ্রাবাসে দেওয়ালি,—তুই দেখছি পাঁজি মানিস নে!

—আজ্ঞে আমি মানি, কিন্তু দেবতার মানেন না। স্বর্গে ত সমস্ত-ক্ষণই শুভক্ষণ। কি বলেন পণ্ডিত মশায়?

—তা ত ঠিকই—আমাদের পক্ষে যা নৈমিত্তিক দেবতাদের পক্ষে তা কাম্য। স্মৃতরাং তাঁরা যখন যা খুসি তখনই সেই উৎসব করতে পারেন।

—শুধু করতে পারেন না, করেও থাকেন। স্বর্গে ত আর উপবাস নেই, আছে শুধু উৎসব। স্বর্গে যদি একাদশী থাকত তাহলে কে আর সেখানে যেতে চাইত? আমি ত নয়ই—

—উনি ত ননই! যেন উনি যেতে চাইলেই স্বর্গে যেতে পেতেন।

—হজুর আমি কোথাও যেতে চাইনে—যেখানে আছি সেইখানেই থাকতে চাই।

—যেখানে আছেন সেইখানেই থাকতে চান! যেন উনি থাকতে চাইলেই থাকতে পেলেন। তুই বোটা ঠিক নরকে যাবি।

—হজুর যেখানে যাবেন আমি সঙ্গে সঙ্গে যাব।

—দেখছেন পণ্ডিত মশায়, ঘোষালের আর যাই দোষ থাক, লোকটা অনুগত-বটে। যাক ও সব বাজে কথা, যার কপালে যা আছে তাই হবে—তুই এখন বল্ তারপর কি হ'ল?

তার পর দেবতার একটা বিগ্নাতের ছুঁচোবাজি ছেড়ে গেলেন। সেটা ঐ কপাটের ফাঁক দিয়ে গলে এসে অন্ধকারের বুকে চিরে ব্রাহ্মণের ছেলের চোখের স্নুমুখ দিয়ে লাউডগা সাপের মত এঁকে বেকে গিয়ে সামনে পড়ল। তার আলোতে দেখা গেল যে দশহাত দূরে একটা পর্কতপ্রমাণ মন্দির খাড়া রয়েছে। ব্রাহ্মণের ছেলে অমনি “ব্যোমভোলানাথ!” বলে হুক্কার দিয়ে ছুটে গিয়ে সেই মন্দিরের ছন্নোর ধাক্কা মারতে লাগল। একটু পরে ভিতর থেকে কে একজন হুক্কা খুলে দিলে। তারপর ব্রাহ্মণ সন্তান ঢোকবার আগেই ঝড় জল হো হা করে মন্দিরের ভিতর গিয়ে পড়ল আর অমনি বাতি গেল নিবে। এই অন্ধকারের মধ্যে ব্রাহ্মণের ছেলেটি হতভম্ব হয়ে দাঁড়িয়ে রইল।

—মন্দিরে ঢুকে ভাবা গঙ্গারামের মত দাঁড়িয়ে রইল ? আর পায়ের জুতো খুললে না—আচ্ছা ব্রাহ্মণের ছেলে ত !

—হুজুর, সে জুতোয় কিছু দোষ নেই,—রবারের ।

—এই যে বল্লি বুট ?

—বুট বটে, কিন্তু রবারের বুট । হুজুর আমার গল্পের নায়ক কি এতই বোকা যে মন্দির অশুদ্ধ করে দেবে ?

ভারপর অনেক ডাকাডাকিতে কেউ জবাব না করায় সে ভদ্রলোক অগত্যা হাতড়ে হাতড়ে কপাটের হুককে বন্ধ করে দিলে । তারপর পকেট থেকে দিয়াশিলাই বার করে আলিয়ে দেখলে যে বাঁ-দিকে একটা হারিকেন লঠন কাৎ হয়ে পড়ে রয়েছে । অনেক কষ্টে সেই লঠনটি জেলে সে দেখতে পেলে—ডান-দিকে দেয়ালের গায়ে—থাড়া রাখছে চিত্রপুস্তকিকার মত—একটি মূর্তি । আর সে কি মূর্তি ! একেবারে মারবেল পাথরে খোদা । ব্রাহ্মণ সন্তান একদৃষ্টে সেই মূর্তির দিকে চেয়ে রইল । সে দেখবার মত জিনিসও বটে । নাকটি তিলফুলের মত, চোখ ছুটি পদ্মফুলের মত, গাল দুটো গোলাপফুলের মত, ঠোঁট দুটি ডালিম ফুলের মত, কাণ দুটি—

—রাখ্ তোর রূপবর্ণনা । লোকটা দেখছি অতি হতভাগা । দেবতার দিকে হাঁ করে চেয়ে রইল, প্রণাম করলে না !

—আজ্ঞে তার দোষ নেই । মূর্তিটি যে কোন দেবতার তা সে ঠাণ্ড কর্তে পারছিল না । কালী, শীতলা, মনসা, চণ্ডী প্রভৃতি কোনও জানাশুনো দেবতা ত নয় ।

—তা নাই হোক, দেবতা ত বটে । দেবতা ত তেত্রিশ কোটি—মানুষে কি তাদের সবাইকে চেনে ? আর চেনে না বলে প্রণাম করবে না ?

—আজ্ঞে লোকটা সম্যাসী । ওদের ত কোন ঠাকুরদেবতাকে প্রণাম কর্তে নেই—ওরা যে সব স্বয়ংব্রহ্ম ।

—দেখ ঘোষাল, মিথ্যে কথা তোর মুখে আর বাধে না দেখছি । এই মাত্র বলেছিস ব্রাহ্মণের ছেলে ।

—আজ্ঞে মিথ্যে কথা নয়, তার গলা-ওপ্টানো কোটের ভিতর দিয়ে পৈতা দেখা যাচ্ছিল ।

—আবার বলছিস্ সম্যাসী ! দেখ যে, কখনো সাধুসম্যাসী দেখে নি তার কাছে গিয়ে এই সব ফকুড়ি কর্ । পরমহংস বেলো, অবধূত বেলো, নাগা বেলো, আকালি বেলো, গিরি বেলো, পুরি বেলো, ভারতী বেলো, বাবাজি বেলো, আর কত নাম করব—রামায়ণে লিঙ্গায়ণে কাণ্ফাটা উর্দ্ধবাহু, দাত্তপত্নী অঘোরপত্নী,—দেশে এমন সাধুসম্যাসী নেই যে আমার পর্যসা খায় নি, আর যার ওষুধ আমি খাই নি । কিন্তু কারও ত কখন পৈতা দেখি নি—এক দণ্ডী ছাড়া । তাদেরও ত বাবা পৈতা গলায় ঝোলানো থাকে না, দণ্ডে জড়ানো থাকে ।

—হুজুর এ, ছোকরা ও সব দলের নয় । এ হচ্ছে একজন স্বদেশী সম্যাসী ।

—সম্যাসী ত বিদেশীই হয়ে থাকে । তুই আবার স্বদেশী সম্যাসী কোথেকে বার করলি ? জানিসনে, গৈয়ো যোগী ভিখ্ পায় না ।

—হুজুর আমি বার করি নি, এরা নিজেই বেরিয়েছে । এরা ভিখ্ চায়ও না, নেয়ও না । এদের পর্যসার অভাব নেই । এরা আপনার ছাইমাখা কোপনি-আঁটা টোঁ টোঁ কোম্পানীর দল নয় । এরা দীক্ষিত নয়—শিক্ষিত সম্যাসী । এরা গেরুয়াও পরে, জুতো মোজাও পরে,

স্বামীও হয়, পৈতাও রাখে। এরা একসঙ্গে ভবঘুরে ও সহুরে, এক রকম গেরস্ত সম্মাসী।

—এরা কিছু মানে টানে ?

—আজ্ঞে এরা কিছুই মানে না, অথচ সবই মানে।

—কথাটা ভাল বুঝলুম না।

—বোঝা বড় শক্ত হজুর। এরা হচ্ছে সব বৈদান্তিক শাক্ত।

—বৈদান্তিক শাক্ত আবার কি রে! এ বেখাপ্লা ধর্মমত পয়দা করলে কে ?

—হজুর, জর্মাণরা। যার সঙ্গে যা একদম মেলে না, তার সঙ্গে তা বেমালুম মিলিয়ে দিতে ওদের মত ওস্তাদ দুনিয়ায় আর কে আছে ? ওরা যেমন পাটে আর পশমে মিলিয়ে কাম্বীরী শাল বুনে এদেশে চালান দেয়—তেমনি ওরা শঙ্করের সঙ্গে শঙ্করী মিলিয়ে এদেশে চালান দিয়েছে।

—চোর বেটারা যেন ভেল চালায়, কিন্তু দেশের লোক তা নেয় কেন ?

—আজ্ঞে সস্তা বলে।

অনেকক্ষণ চুপ করে থাকা উজ্জ্বলনীলমণির ধাতে ছিল না। তিনি বললেন—

—ঘোষাল যাদের কথা বলছে তারা সব প্রচ্ছন্ন বৌদ্ধ। আমার পাসকরা শিষ্যেরাই হচ্ছে খাঁটি বৈদান্তিক বৈষ্ণব।

—অর্থাৎ এঁদের কাছে সাকার ও নিরাকারের ভেদ শুধু উপসর্গে; এবং সে ভেদজ্ঞানও এঁদের নেই, এঁরা খুসিমত সা'র জাগায় নি এবং নি'র জায়গায় সা বসিয়ে দেন।

রায় মহাশয়ের আর ধৈর্য থাকল না। তিনি বেজায় রেগে উঠে চীৎকার করে বললেন—

—তোমার টাকা টিপ্পনি রাখা হে ঘোষাল! আমার কাছে ও-সব বুজরুকি চলবে না। ইফ্পিটা দুপাতা ইংরেজি পড়ে সব সোহহং হয়ে উঠেছে। আমি জানি এরা সব কি—হয় বর্ণচোরা নাস্তিক নয় বর্ণচোরা খৃষ্টান। ঐ অকালকুস্মাণ্ডটা বৈদান্তিক শাক্তই হোক আর বৈদান্তিক বৈষ্ণবই হোক, গেরস্তই হোক আর সম্মাসীই হোক, স্বদেশীই হোক আর বিদেশীই হোক, তোমার ঐ ব্রাহ্মণের ছেলের ঘাড় ধরে ঐ দেবতার পায়ে মাথা ঠেকাও।

—হজুর, ওকে দিয়ে যদি এখন প্রণাম করাই তাহলে আমার গল্প মারা যায়।

—আর যদি প্রণাম না করে ত কান ধরে মন্দির থেকে বার করে দে।

—হজুর, তাহলেও আমার গল্প মারা যায়।

—যাক্ মারা। আমি ঐ সব গোঁয়ারগোবিন্দ লোকের যথেষ্টাচারের কথা শুনতে চাইনে।

—হজুর যদি জোর করেন ত আমি নাচার। গল্প তাহলে এই-খানেই বন্ধ করলুম।

—বেশ! এ মাসের মাইনেও তাহলে এইখানেই বন্ধ হল।

এই কথা শুনে ঘোষাল শশব্যস্তে বলে উঠল—

—হজুর, আপনি মিছে রাগ করছেন। মূর্তিতে যদি দেবী না হয়ে মানবী হয় ?

—এ আবার কি আজগুবি কথা বার করলি ? এই ছিল দেবতা আর এই হয়ে গেল মানুষ !

—দেবতা যে মানুষ আর মানুষ যে দেবতা হয়, এ ত আর আজগুবি কথা নয়। এ কথা ত সকল দেশের সকল শাস্ত্রেই আছে। তবে আমি ত আর পুরাণকার নই। এরকম ওলটপালট আমি করলে কেউ তা মানবে না—আপনিও বলবেন ওর ভিতর বস্তুতন্ত্রতা নেই। ব্যাপারখানা আসলে কি তা বলছি। হুজুর মনোযোগ করবেন। ব্রাহ্মণের ছেলে যখন মন্দিরের দরজা ঠেলছিল তখন ভিতরে যদি জন প্রাণী না থাকত, তাহলে ছড়কো খুলে দিলে কে ? আর যখন দেখা গেল যে মন্দিরের মধ্যে অপর কোনও কিছু নেই, তখন আগে যাঁকে প্রতিমা বলে ভুল হয়েছিল, তিনিই যে ও দ্বার মুক্ত করেছিলেন, সে বিষয়ে আর কোনও সন্দেহ থাকতে পারে না। সেটি যখন দেখতে দেবীর মত অথচ দেবী নয়—তখন অঙ্গরা না হয়ে আর যায় না।

—খুব কথা উন্টে নিতে শিখেছিস্ বটে।

ব্রাহ্মণের ছেলে যখন দেখলে যে সেই মূর্তির চোখে পলক পড়ছে, নাকে নিশ্বাস পড়ছে, তখন আর তার বুকে বাকী থাকল না যে, স্বর্গের কোনও অঙ্গরা অভিসারে বেরিয়েছিল, অঙ্গরাকে পথ ভুলে পৃথিবীতে এসে পড়েছে আর এই ঝড়বৃষ্টির ঠেগার এই মন্দিরে এসে আশ্রয় নিয়েছে। বেচারী মহা কাঁপরে পড়ে গেল। দেবী হলে পূজো করতে পারত, মানবী হলে প্রণয় করতে পারত; কিন্তু অঙ্গরাকে নিয়ে সে বিংকর্তব্যবিহীন হয়ে পড়ল। তার মনের ভিতর এক দিক থেকে ভক্তি আর একদিক থেকে প্রীতি ঠেলে উঠে পরম্পর লড়াই করতে লাগল।

—কি বললি—ভক্তি ও প্রীতি পরম্পর লড়াই করতে লাগল ? ও দুই ত এক সঙ্গেই থাকে।

—ও দুই শুধু একসঙ্গে থাকে না—একই জিনিস। আমাদের মতে ভক্তি পরাপ্রীতি আর প্রীতি অপরা-ভক্তি।

—মাপ করবেন গৌসাইজি। ভক্তির জন্ম ভয়ে, আর প্রীতির জন্ম ভরসায়। ও দুই একসঙ্গে ঘর করে বটে, কিন্তু সে বোন সতীনের মত।

—ব্রাহ্মণের ছেলেকে ওরকম অকর্ষক্কে ফেলে রাখা ঠিক নয়। অঙ্গরাদের প্রতি ভক্তি ! রামো, সে ত হবারই জো নেই, তবে প্রণয়ে দোষ কি ?

—হুজুর, দোষ কিছু নেই, সম্পর্কে বাধে না। তবে লোকে বলে অঙ্গরার সঙ্গে প্রেম করলে মানুষে পাগল হয়।

—আরে তাতে কি গেল এল ? যার সঙ্গেই হোক না প্রেম করলেই ত মানুষে পাগল হয়।

—কথা ঠিক, কিন্তু সে হচ্ছে একরকম সৌখীন পাগলামি। স্ত্রী-লোকের সঙ্গে ভালবাসায় পড়লে লোকে মাথায় মধ্যম-নারায়ণ মাখে না, মাখে কুন্তলবৃষ্য। আর অঙ্গরার টানে মানুষ হয় উন্মাদ পাগল। তখন স্বর্গে না গেলে আর মানুষের নিস্তার নেই—অথচ সেখানে প্রবেশ নিষেধ। কি বলেন পণ্ডিত মশায় ?

—প্রমাণ ত হাতেই রয়েছে,—বিক্রমোর্ধ্বশী।

—শুনলেন হুজুর, পণ্ডিত মশায় কি বললেন ? এ অবস্থায় ও ব্রাহ্মণ সন্তানটিকে কি করে ভালবাসায় ফেলি ?

—তাহলে কি গল্প এইখানেই বন্ধ হ'ল ?

—আজ্ঞে তাও কি হয়? যা হল তা শুনুন—

ব্রাহ্মণের ছেলেকে অমন উদযুস করতে দেখে, সেই মূর্তিটিও একটু ভীত ভক্ত হয়ে উঠল, অমনি তার কাঁধ থেকে অঙ্কল পড়ল খসে। ব্রাহ্মণের ছেলে দেখতে পেলে তার কাঁধে ভানা নেই, ব্যাপারটা যে কি তখন আর তার বুঝতে বাঁকি থাকল না। এখন বুঝছেন হুজুর, ওকে দিয়ে প্রশ্নাম করলে কি অনর্থটাই ঘটত? একে তরুণ বয়েস, তাতে আবার হাতের গোড়ায়, পড়ে-পাওয়া ডানাকাটা পরি! তার উপর আবার এই দুর্ঘোণের অযোগ। এ অবস্থায় পুরুতপা ঋষিদেরই মাথার ঠিক থাকে না—ব্রাহ্মণের ছেলে ত মাত্র বালা-ঘোষী। পরম্পর পরম্পরের দিকে চাইতে লাগল—ব্রাহ্মণ যুবক সিধে ভাবে, আর যুবতীটি আড়ভাবে। চার চক্ষুর মিলন হবামাত্র সেই হৃন্দরীর নয়ন-কোণ থেকে একটি উদ্ভাঙ্গনা খসে এসে ব্রাহ্মণের ছেলের চোখের ভিতর দিয়ে তার মরমে গিয়ে প্রবেশ করলে। ব্রাহ্মণের ছেলের বুক বিলেতি বেদান্ত পড়ে পড়ে শুকিয়ে একেবারে সোলার মত চিমসে ও খড়খড়ে হয়ে গিয়েছিল—কাল্পেই সেই হৃন্দরীর চোখের চকমকি-ঠোকা আঙনের জ্বলকিটি সেখানে পড়বা মাত্র সে বৃকে আঙন জলে উঠল। আর তার ফলে, তার বৃকের ভিতর যে ধাতু ছিল সে সব গলে একাকার হয়ে উঠলে উঠতে লাগল আর অমনি তার অন্তরে ভূমিকম্প হতে আরু হল। তার মনে হ'ল যেন তার পাঁজরা সব খসে বাচ্ছে। সঙ্গে সঙ্গে তার সর্বাঙ্গ ধর ধর করে কাঁপতে লাগল, মুখের ভিতর কথা জড়িয়ে যেতে লাগল, মাথা দিয়ে ঘাম পড়তে লাগল। এক কথায় ম্যালেরিয়া-জ্বর আসবার সময় মাহুঘের যে অবস্থা হয় তার ঠিক সেই অবস্থা হ'ল। ব্রাহ্মণের ছেলে বুঝলে তার বৃকের ভিতর ভালবাসা জন্মাচ্ছে।

এই বর্ণনা শুনে উজ্জ্বল নীলমণি অত্যন্ত ঘৃণাব্যঞ্জক স্বরে বলে উঠলেন—

—আহা! পূর্বরাগের কি চমৎকার বর্ণনাই হ'ল। রসশাস্ত্রে যাকে

বলে সাদ্বিক ভাব তার উপশাহ'ল কি না ম্যালেরিয়া-জ্বর। ঘোষাল যখন মধুর রসের কথা পেড়েছিল, তখনই জানি ও শেষটা বীভৎস রস এনে ফেলবে। আর লোকে বলবে ঘোষাল কি রসিক।

ঘোষাল এ সব কথার কোন উত্তর না করে স্মৃতিরত্নের দিকে চাইলে। সে চাউনির অর্থ—মশায় জবাব দিন। স্মৃতিরত্ন বললেন—

—ত্রিগুণের সাম্যাবস্থাতেই ত চিত্ত প্রকৃতিস্থ থাকে। আর তুমি যাকে সাদ্বিকভাব বলছ সেও ত একটা চিত্তবিকার ছাড়া আর কিছুই নয়। স্মৃতরাং ও মনোভাবকে মনের জ্বর বলায় ঘোষাল কি অন্য় কথা বলেছে?

—পণ্ডিত মশায়, শুধু তাই নয়। ম্যালেরিয়ার সঙ্গে ও জিনিসের আরও অনেক মিল আছে। দুয়ের চিকিৎসাও এক, মধুর রসেরও ওষুধ তিস্তরস। তস্বকথার কুইনি'ন খাওয়ালে ভালবাসা মানুষের মন থেকে পালাতে পথ পায় না।—

দেওয়ানজি এ কথার প্রতিবাদ করে বললেন—কুইনি'নে বৃষ্টি জ্বর ছাড়ে? শুধু আটকে দেয়। শিশি শিশি কুইনি'ন গিলেছি কিন্তু আমার পিলে—

রায় মহাশয় এতক্ষণ অগ্নমনক হয়ে কি ভাবছিলেন। উজ্জ্বল-নীলমণি ও স্মৃতিরত্নের কথায় তিনি কাণ দেন নি, কিন্তু দেওয়ানজির কথাটি তাঁর কাণে পৌঁছেছিল। তিনি মহা গরম হয়ে বললেন—

—চুপ করো হে দেওয়ানজি, তোমার পিলে কত বড় হয়ে উঠছে, সে কথা শুনে শুনে আমার কাণ পচে গেল। ঘোষালের যে যক্ষুৎ শুকিয়ে যাচ্ছে, কৈ ও ত নিয়ে রাত নেই দিন নেই যার তার কাছ

মাকে কাঁদতে বসে না। পিলে যুক্তের চাইতে বা দশগুণ বেশী সাংঘাতিক, তাই হয়েছে ঐ ব্রাহ্মণের ছেলের,—হৃদরোগ। ও যে কি ভয়ানক রোগ তা আমি ভুগে ভুগে টের পেয়েছি। সে যা হোক, ঘোষাল যে একটা ব্রাহ্মণের ছেলেকে রাতছপুরে একটা তেপান্তর মাঠের ভিতর একটা মন্দিরের মধ্যে একটা মেয়ের হাতে সঁপে দিলে, অথচ তার কে বাপু কে মা, কি জাত কি গোত্র জানা নেই; সে বিষয়ে দেখছি তোমাদের কারও খেয়াল নেই। হ্যা দেখ ঘোষাল, তুই ব্রাহ্মণের ছেলের জাত মারবার আচ্ছা ফন্দি বার করেছিস! উজ্জ্বল-নীলমণি যে বলেছিল তোর ধর্মজ্ঞান নেই এখন দেখছি সে কথা ঠিক।

—আজ্ঞে সে কথা আমি অল্প সূত্রে বলেছিলুম। যা ঘটনা হয়েছে তাতে ঘোষালের দোষ নেই। পূর্ববরাগ ত আর জাতবিচার করে হয় না। এ বিষয়ে বিছাপতি ঠাকুর বলেছেন “পানি পিয়ে পিছু জাতি বিচারি”—

—বটে! তবে যাও মুসলমানের ঘরে খাও পানি, বদনায় করে। তারপরে এখানে একবার জাতবিচার করতে এসে দেখো কি হয়।

—হুজুর, গোসাইজি কথা ঠিকই বলেছেন—শুধু একটা কথায় একটু ভুল করেছেন। “পানি” না বলে ব্রাণ্ডিপানি বললে আর কোনও গোলই হত না। জল অবশ্য যার তার হাতে খাওয়া যায় না, কিন্তু মদ সকলের হাতেই খাওয়া যায়। আর ভালবাসা জিনিসতে ত দুনিয়ার সেরা মদ।

—তোর দেখছি হতভাগা শুড়িখানা ছাড়া আর কোথায়ও উপমা জোটে না। তোরা দুটোয় মিলেছিস ভাল। একে মনসা তায় ধুনোর গন্ধ। একে ঘোষাল মুলগায়েন তার উপর আবার উজ্জ্বলনীলমণি

দোহার। এ বিষয়ে পণ্ডিত মশায়ের মত শুনতে চাই—তোদের কথা শুনতে চাই নে।

—অজ্ঞাত-কুলশীলার প্রতি ভালবাসার ঐরূপ আচম্বিতে জন্মাভটা স্মৃতির হিসেবে নিন্দনীয়, কিন্তু কাব্যের হিসেবে প্রশস্ত। শকুন্তলা, দময়ন্তী, মালবিকা, বাসবদত্তা রত্নাবলী মালতী প্রভৃতি সব নায়িকারই ত—

—তাহলে কি আপনি বলতে চান স্মৃতির ধর্ম এক আর কাব্যের ধর্ম আলাদা?

—আজ্ঞে তা ত হবেই। স্মৃতির কারবার মানুষের জীবন নিয়ে আর কাব্যের কারবার তার মন নিয়ে।

—কাব্যের শিক্ষা আর স্মৃতির শিক্ষা যদি উণ্টো হয়, তাহলে মানুষে কোনটা মেনে চলবে?

—চুটোই। কাজকর্মের স্মৃতি আর লেখাপড়ায় কাব্য।

—দেখুন রায় মহাশয়, ঐখানেই ত স্মার্ত ভট্টাচার্য মহাশয়দের সঙ্গে আমাদের মতের অমিল। আমরা বলি রস এক—তা সে জীবনেই হোক আর কাব্যেই হোক।

—তাহলে আপনারা কি চান, যে গল্পটা হোক জীবনের মত আর জীবনটা হোক গল্পের মত?

—আজ্ঞে তা নয় হুজুর। ভট্টাচার্য-মতে, জীবনে ফেন ফেলে দিয়ে ভাত খেতে হয় আর কাব্যে ভাত ফেলে দিয়ে ফেন খেতে হয়; কিন্তু গোস্বামী-মতে কি জীবনে কি কাব্যে একমাত্র গলা ভাতেরই ব্যবস্থা আছে।

—তুমি থামো ঘোষাল, এ সব বিষয়ে বিচার করবার অধিকার তোমার নেই। পরিণামবাদ কাকে বলে যদি বুঝতে.....

—ঘোষাল তা না বুঝতে পারে, কিন্তু অপরিণামবাদ কাকে বলে তা বুঝলে আপনি ও সব বাক্য মুখ দিয়ে উচ্চারণ করতেন না। অলঙ্কার শাস্ত্র যদি ধর্মশাস্ত্রের সিংহাসন অধিকার করে, তাহলে তার পরিণাম সমাজের পক্ষে কি ভীষণ হয় ভেবে দেখুন তা।

—ঠিক বলেছেন পণ্ডিত মশায়, উনি কাব্যে ও সমাজে ভেস্তে দিতে চান—যে দুয়ের প্রভেদ আকাশপাতাল। সমাজে হয় আগে বিয়ে, পরে সম্ভান, তারপরে মৃত্যু; আর কাব্যে হয় আগে ভালবাসা তারপর হয় বিয়ে নয় মৃত্যু। এক কথায় মানুষের জীবনে যা হয় তার নাম প্রাণান্ত। কাব্য কিন্তু হয় মিলনান্ত নয় বিয়োগান্ত; হয় ঘটক নয় ঘটক হওয়া ছাড়া কবিদের আর উপায় নেই।

—তাহলে তুই দেখছি এ ব্রাহ্মণের ছেলের হয় জাত মারবি নয় প্রাণ মারবি।

—আজ্ঞে প্রাণে মারতে পারি কিন্তু জাত কিছুতেই মারব না। ছজুরের কাছে গল্প বলছি, আর আমার নিজের প্রাণের ভয় নেই?

—দেখ তোকে আগেই বলেছি ব্রহ্মহত্যা কিছুতেই হতে দেব না।

—আজ্ঞে যদি আখেরে মাথায় বাজ পড়ে লোকটা মারা যায় সেও কি আমার দোষ?—এ দুর্যোগ কি আমি বানিয়েছি?

—কি বললি? ব্রাহ্মণের অপমৃত্যু, মন্দিরের ভিতরে আর আমার স্তম্ভে, বেটা আজ গাঁজা টেনে এসেছিল বুঝি! যেমন করে পারিস মিলনান্ত করতেই হবে—বিয়োগান্ত কিছুতেই হতে দেব না।

—আজ্ঞে আমিও ত সেই চেন্টায় আছি। তবে ঘটনাচক্রে কি হয়-

তা বলতে পারি নে। একটা কথা আপনার পা ছুঁয়ে বলছি, যেমন করেই হোক আমি ওর জাত আর প্রাণে দুই টি'কিয়ে রাখব—তারপর যা হয়। ছজুর আমার বেয়াদবি মাপ করবেন, যদি একটু খৈর্য ধরে না থাকেন তাহলে গল্প এগুবে কি করে, আর যদি না এগোয় ত তার অন্তই বা হবে কি করে।

—আচ্ছা বলে যা।

—তবে শুনুন।

ব্রাহ্মণের ছেলে প্রথমটা যতটা হতবুদ্ধি হয়ে পড়েছিল, শেষে আর ততটা থাকল না। সব বিপদের মত ভালবাসার প্রথম ধাক্কাটা সামলানো মুশ্কিল, তার পর তা সয়ে আসে। ক্রমে যখন তার জ্ঞানচৈতন্য ফিরে এল, তখন সে সেই মেয়েটাকে ভাল করে খুঁটিয়ে দেখতে লাগলে। প্রথমেই তার চোখে পড়ল যে মেয়েটির মাথার চুল কপালের উপর চূড়ে করে বাঁধা—আমাদের মেয়েরা নেয়ে উঠে চুল যেমন করে বাঁধে তেমনি করে,—বোধহয় চুল ভিজে গিয়েছিল বলে। ওরপর চোখে এর্দে ঠেকল তার গড়ন। সে অঙ্গসৌষ্ঠবের কথা আর কি বলব। তার দেহটি ছিল তার চোখের মত লম্বা, তার নাকের মত সোজা আর তার ঠোঁটের মত পাতলা। কিন্তু বেচারি—ভিজে একেবারে সপসপে হয়ে গিয়েছিল। তার শাড়ী হুঁইয়ে মরবিগলিত ধারে জল পড়ছিল, মনে হচ্ছিল যেন তার সর্বাস্ব রোদন করছে। এই দেখে ব্রাহ্মণের ছেলের ভারি মায়া হল, সঙ্গে সঙ্গে তার বকের ভিতরও আত্মপ্রাণী কাঁদতে শুরু করে দিলে।

—“চলে নীলশাড়ী নিঙাড়ি নিঙাড়ি

পরান সহিত মোর।”

—কি? কি? উজ্জ্বল নীলমণি আবার কি বলে?

—হজুর, গৌসাইজির ভাব লেগেছে তাই ইনি পদাবলী
আওড়াচ্ছেন। উনি বলছেন—

“চলে নীলশাড়ী নিঙাড়ি নিঙাড়ি

পরায় সহিত মোর।”

—ঘোষাল! মেয়েটার পরণে কি রঙের শাড়ী ছিলরে?

—হজুর, লাল।

—আঃ! ঐ এক কথায় সব মাটি করলে হে।

“চলে লাল শাড়ী নিঙাড়ি নিঙাড়ি

পরায় সহিত মোর”

বললে ও কবিতার আর থাকে কি? আর যার তুল্য কবিতা
ভূ-ভারতে কখন হয়ও নি হবেও না, তারই কি না জান মেরে দিলে?

—গৌসাইজি গোসা করছেন কেন? আমি যে রঙ চড়িয়েছি
তাতেই ত উপমা মেলে। মানুষের পরায় যদি কেউ নিঙড়ায় তা হলে
তা থেকে যা বেরবে তার রঙ ত লাল। তবে বলতে পারিনি, হতে পারে
যে কারও কারও রক্তের রঙ ও চামড়ার রঙ এক—ঘোর নীল।

—নাই পেয়ে পেয়ে এখন দেখছি তুমি ভদ্রলোকের মাথায় চড়ছ।

—রাগ করেন কেন মশায়। কোনও সাহেবকে যদি বলা যায় যে
তোমার গায়ের রক্ত নীল, তাহলে ত সে না চাইতে চাকরি দেয়।

আবার একটা বকাবকির সূত্রপাত দেখে রায় মহাশয় হস্কান ছেড়ে
বললেন,—

—যদি কথায় কথায় তর্ক তুলিস তাহলে রাত দুপুরেও গল্প শেষ
হবে না—আর তুই ভেবেছিস এইখানেই আজ রাত কাটা—

—হজুর, তর্ক আমি করি? আমি একজন গুণী লোক—নডেলিফ।

কথায় বলে যাদের আর গুণ নেই তাদের ছার গুণ আছে। যারা
গল্প করতে পারে না তারাই ত তর্ক করে।

—তারি গুণী! কি চমৎকার গল্পই বলছেন।

—মটে! আমি এইখান থেকেই ছেড়ে দিচ্ছি, আপনি গৌসাইজি
তারপর চালান দেখি ত কতক্ষণ চালাতে পারেন—হজুরের এক
প্রশ্নের ধাক্কাতেই উণ্টে চিৎপাত হয়ে পড়বেন—

—ওরে ঘোষাল, ভাল কথা মনে করিয়ে দিয়েছিস। আমার
আর একটা প্রশ্ন আছে—মেয়েটার বয়স কত?

—উনিশ কি বিশ।

—সধবা না বিধবা?

—কুমারী। কাব্যে হজুর কুমারী ছাড়া আর কিছু ত চলে না।

—আমাকে বোকা পেয়েছিস না খোঁকা পেয়েছিস? ছ-ছেলের
মা'র বয়সী, আর তিনি হলেন কুমারী! বাঙ্গালীর ঘরে কোথায় এত
বড় আইবুড়া মেয়ে দেখেছিস বল ত?

—হজুর, মেয়েটি ত বাঙ্গালী নয়—হিন্দুস্থানী।

—যেই একটা মিথ্যে কথা ধরা পড়েছে অমনি আর একটা মিথ্যে
কথা বানাচ্ছিস। কোথাও কিছু নেই—বলে দিলি হিন্দুস্থানী!

—হজুর, তার গায়ে ঝুলছিল সলমাচুমকির কাজ করা ওড়না, আর
তার শাড়ীর স্তমুখে ঝুলছিল কোঁটা।

—হো'ক না হিন্দুস্থানী। হিন্দুস্থানী ও ত হিন্দু। আর তোদের
চাইতে ঢের পাকা হিন্দু। তাদের মেয়েদের পেটে থাকতেই পাত্র
ঠিক ও পত্র হয়ে যায়। জানিস দুখের দাঁত পড়বার আগে মেয়ের

বিয়ে না হলে তাদের জাত যায়? কোন হিন্দুস্থানী হিঁদুর বাড়ীতে অত বড় মেয়ে আইবুড় দেখেছিস—বলত গাথা!

—হজুর, মেয়েটা হিঁদু নয়, মুসলমান।

—কি বললি—মুসলমান? হিন্দুর মন্দিরে যেখানে শূদ্রের প্রবেশ নিষেধ, সেইখানে রাসকেল মুসলমান ঢুকিয়েছিস! মন্দির অপবিত্র হবে, ব্রাহ্মণের ছেলের জাত যাবে, কি সর্বনাশের কথা! লক্ষ্মীছাড়িকে এখন মন্দির থেকে বার করে দে!

—হজুর, এই দুর্ব্যোগের মধ্যে—

—দুর্ব্যোগ ফুর্ব্যোগ জানি নে, এই মুহূর্তে ঐ মুসলমানীকে দে অর্দ্ধচন্দ্র।

—হজুর, বাইরে ত দেবতা অপ্রসন্ন আর ভিতরেও যদি দেবতা আশ্রয় না দেন ত বেচারী যায় কোথায়? হোক না মুসলমান, মানুষ ত বটে,—আমাদের মত ওরও রক্ত-মাংসের শরীর।

—খোপ্তহরতি দেখে বেটার ধর্মজ্ঞান লোপ পেয়েছে! আমার হুকুম মানবি কি না বল? হয় ওকে মন্দির থেকে বার কর নয় তোকে ঘর থেকে বার করে দিচ্ছি,—এই জমাদার! ইস-কো গরদান পাঁকড়কে নিকাল দেও!

—হজুর, একটু সবুর করুন। হজুরের হুকুম তামিল না করতে হলে আমাকে কি আর এতটা বেগ পেতে হ'ত? ওকে কি আমাকে কাউকে গরদানি দিতে হবে না। মেয়েটি হিন্দুস্থানীও নয়, মুসলমানীও নয়, বাঙ্গালী কুলীন ব্রাহ্মণের মেয়ে।

—আবার মিথ্যে কথা? কুলীনের মেয়ে গায়ে ওড়না ওড়ে আর কোঁচা দিয়ে শাড়ী পরে।

—হজুর, ও আমার দেখবার ভুল। শাড়ীটে ভিজে স্নমুখের দিকে জড় হয়ে গিয়েছিল তাই দেখাচ্ছিল যেন কোঁচা—আর গায়ে ছিল চেলির চাদর তাই ওড়না বলে ভুল করেছিলুম।

—এই যে বললি সলমা চুমকির কাজ করা?

—হজুর, ঐ চাদরের উপর গোটাটকতক জোনাকি বসেছিল তাই চুমকির মত দেখাচ্ছিল।

—তাই বল। আঃ! বাঁচা গেল। ঘাম দিয়ে জ্বর ছাড়ল!

—হজুর, আপনার না হোক আমার ত তাই। জমাদারের নাম শুনে ভয়ে ত আমার পাঁচ প্রাণ দশদিকে উড়ে গেছিল। ভুল করে একটা কথা.....

—অমন ভুল করিস কেন?

—হজুর, অমন ভুল অনেক বড় বড় কবিরাও করেন, আমি ত কোন্ ছার—তবে তাঁদের বেলায় সে সব ছাপার ভুল বলে পার পেয়ে যায়।

—সে যাই হোক। ঘোষাল এতক্ষণে গল্পটা বেশ গুছিয়ে এনেছে। কুলীন ব্রাহ্মণের মেয়ে, এতদিন বিয়ে হয় নি, শেষটা ভগবানের অনুগ্রহে কেমন বর জুটে গেল। একেই ত বলে প্রজাপতির নির্বন্ধ। ঘোষাল, তোর মুখে ফুলচন্দন পড়ুক। তুই যে খালি ব্রাহ্মণের ছেলের জাত বাঁচিয়েছিস তাই নয়—ব্রাহ্মণের মেয়ের বাপেরও জাত বাঁচিয়েছিস। এখন নিশ্চিত মনে গল্প বলে যা। কি খেয়ে গল্প বলিস বল ত? এবার তোকে বিলেতি খাওয়াব।

—হজুরের, প্রসাদ চরণায়ুত জ্ঞানে পান করব, তারপরে মুখ দিয়ে ঝেরবে অনর্গল বিলেতি গল্প। এখন যা হল শুনুন।

ভালবাসা জিনিসটে অস্তিত্ব: কাব্যে একটা সংক্রামক ব্যাধি। কবিরা এক-
জনের মনের সিগরেট থেকে আর একজনের মনের সিগরেট ধরিয়ে নেন।
কাব্যের এ হচ্ছে মামুলি দস্তুর। তাই আমাকে বলতেই হবে যে ব্রাহ্মণের ছেলের
ভালবাসার ছোঁয়াচ বেগে সেই কুলীন-কুমারীর মনে, শ্যাম্পোনের নেশার মত
আস্তে আস্তে ভালবাসার রং ধরতে শুরু করলে।

—কি বললি—শ্যাম্পোনের নেশার মত আস্তে আস্তে? গাছে না
উঠতেই এক কাঁধি—বিলেতির নাম শুনেই অজ্ঞান হয়েছিলাম আর
বেফাঁস বকছিলাম। বেটা খাঁটির খদ্দের, শ্যাম্পোনের গুণাগুণ তুই কি
জানিস? পোর্ট বন্ড ক্লারেরট বন্ড জিন বন্ড রন্ড বন্ড ছইস্কি বন্ড
আণ্ডি বন্ড—আমার ত আর কিছু জানতে বাকী নেই। শ্যাম্পোনের
নেশা হয় ধরেনা, নয় চট করে মাথায় চড়ে যায়। ভালবাসার নেশা
যদি আস্তে আস্তে চড়াতে চাস ত সেরীর সঙ্গে তুলনা দে,—গেলাসের
পর গেলাসে বা রেস্তোর গাঁথুনি গাঁথে যায়।

—হজুর ঠিক বলেছেন, মেয়েমানুষের মনে ভালবাসা আস্তে আস্তে
বাড়ে বটে, কিন্তু তার বনেদ্ খুব পাকা হয়। ওদের মনে ও বস্তু
একবার শিকড় গাড়লে তা আর উপড়ে ফেলা যায় না—কেননা
সে শিকড় শুধু ভিতরের দিকেই ডুব মারে। কিন্তু হজুর
এইখানে একটু মুঁকিলে পড়েছি। স্ত্রীলোকের ভালবাসা বর্ণনা করা
যায় না, কেননা তার কোনও বাইরের লক্ষণ দেখা যায় না; আর যদি
দেখা যায়, তাহলেই বুঝতে হবে সে সব হাবভাব, ভিতরে সব ফাঁকা।

—তবে কি ওদের মনের কথা জানবার যো নেই?

—আমি ত তা বলিনি,—আমি বলছি জানা দুঃসাধ্য কিন্তু অসাধ্য,
নয়। ওদের মুখ ওদের বুকের আয়না নয়। যেমন পুরুষের পাণ্ডুরোপ,

তেমনি স্ত্রীলোকের হৃদরোগ ধরা পড়ে চোখে, এখানেও মেয়েটা এই
চোখেই ধরা দিলে। কি হল শুনুন।

ভয় চোখের ভিতর একটা অতি চিমে অতি ঠাণ্ডা আলো ফুটে ওঠল।
কিন্তু সে আলো বিদ্রাভের। সে বিদ্রাৎ স্ত্রী-বিদ্রাৎ বলে অত ঠাণ্ডা। সেই স্ত্রী-
বিদ্রাভের টানে ব্রাহ্মণের ছেলের চোখ থেকে পুং-বিদ্রাৎ ছুটে বেরিয়ে এল—তার-
পর সেই ছই বিদ্রাৎ মিলে লুকোচুরি খেলতে লাগল।

“নয়ন ঢুলাঢুলি লছ লছ হাস

অঙ্গ হেলাহেলি গদগদ ভাষ।”

—উজ্জ্বল নীলমণি আবার কি বলে হে?

—আজ্ঞে ওঁর ভাবেল্লাস হয়েছে তাই উনি আখর দিচ্ছেন।

—আখরই দিন আর যাই দিন আমি বলে রাখছি যে আখরে এই
“নয়ন ঢুলাঢুলি লছ লছ হাসের” বেশী আর আমি যেতে দেব না।

—আজ্ঞে এর একটা ত আর একটার অবশুস্তাবী পরিণাম।

—রাখো হে তোমার পরিণামবাদ, অমন চের চের দর্শন দেখছি।

—হজুর, গৌসাইজির কথা শুধু দর্শন নয়, বিজ্ঞানসম্মতও বটে।
কোন বস্তুর ভিতর বিদ্রাৎ সঁদুলে তা আপনি হয়ে ওঠে চুষক।

—বটে! হতভাগারা মরবার আর জায়গা পেলেন না। দেবমন্দিরকে
করে তুললে একটা কুঞ্জবন। যেমন আক্কেল ঘোষালের, তেমনি
উজ্জ্বল নীলমণির—এখন দেখছি এ ছুটো মাসতুতো ভাই।

—হজুর, বড় বড় কবিরাও এ কাজ পূর্বের করে গিয়েছেন।

—সত্যি নাকি পশ্চিম মশায়?

—আজ্ঞে আমি ত কোন সংস্কৃত কাব্যে দেখি নি যে দেবালয়
হয়েছে প্রেমের রক্ষালয়।

—আমাদের পদাবলীতেও ও সব ব্যাপার মন্দিরের বাইরেই ঘটে।
বিছাপতি ঠাকুর বলেছেন—“যব গোধূলী সময় ভেলি ধনী মন্দির
বাহির ভেলি।”

—ঘোষাল নিজে করুবি কুকীর্তি আর বড় বড় কবিদের ঘাড়ে
চাপাবি দোষ।

—হজুর, আমি মিথ্যে কথা বলি নি—বাংলার বড় বড় লেখকেরা
এ কাজ না করলে আমার কি সাহস যে আমি আগে ভাগেই তা করে
বসব,—আমি ত একজন ছোট গল্পকার। মহাজনো যেন গত স পন্থা
হিসেবেই আমি চলি।

—বাংলা আবার ভাষা, তার আবার লেখক, তার আবার নজির।
মন্দিরের ভিতর আমি মধুর রসের চর্চা আর বেশী করতে দেব না,
কে জানে তোদের হাতে পড়ে সে রস কতদূর গড়াবে।

—তাহলে বলি হজুর, ওটা আসলে মন্দির নয়, ভোগের দালান।

—আবার মিথ্যে কথা? এই হাজার বার বলেছি মন্দির আর
এখন বলছিস ভোগের দালান।

—হজুর, মন্দির হলে আর তার ভিতর ঠাকুর থাকত না? আগেই
ত বলেছি যে সেখানে একটি ছাড়া দুটি মূর্তি ছিল না।

—তাও ত বটে! খুব ডিগ্বাজি খেতে শিখেছি। তুই আর জন্মে
ছিলি গেরবাজ।

—হজুরের কৃপায় এখন লোটন না হলেই বাঁচি।

—আচ্ছা বাকু, এখন তুই গল্প বলে যা, গল্পটা এতক্ষণে জন্মেছে।

—হজুর তার পর—

ব্রাহ্মণ সন্তানটি এমনি মেহভরে ব্রাহ্মণ কন্ঠাটির দিকে দৃষ্টিপাত করতে
লাগল যে তার গায়ে সাত্বিকভাবের লক্ষণগুলি সব ফুটে উঠল। তার কপাল বেয়ে
ঘামের সঙ্গে সিঁথের সিঁছর গলে তার ঠোঁটের উপর পড়ল আর তার অধর পান-
খাওয়া ঠোঁটের মত লাল টুকটুকে হয়ে উঠল।

—রোস্ রোস্ সিঁছরের কথা কি বললি?

—কই হজুর, সিঁছরের নামও ত ঠোঁটে আনি নি!

—উঃ তুই কি ঘোর মিথ্যাবাদী! সিঁছর শুধু নিজের ঠোঁটে
আনিস নি, ওর ঠোঁটেও মাথিয়েছিস—

—তাহলে হজুর, ও মুখ কক্ষে হয়ে গেছে।

—ও সব জুয়োচ্চুরি কথা আর শুনছি নে। একটা সধবাকে
রাসকেল আমাকে ঠকিয়ে কুমারী বলে চালিয়ে দিচ্ছিল।

—আজ্ঞে সধবাই যদি হয় তাতেই বা ক্ষতি কি?

—কি বললে উজ্জ্বল নীলমণি, ক্ষতি কি?

—আজ্ঞে আমি বলছিলাম কি, নায়িকা ত পরকীয়াও হয়—

এ কথা শুনে সভাস্থল লোক একবাক্যে ছি ছি করে উঠল।
উজ্জ্বল নীলমণি তাতে ক্ষান্ত না হয়ে বললেন—

—হয় কি না হয় তা বিবর্তবিলাস, মীরাবাইয়ের করচা প্রভৃতি
পড়ে দেখুন, এমন কি কবিরাজ গোস্বামী পর্যন্ত……

এই কথায় একটা মহা হৈ চৈ পড়ে গেল, সকলে এক সঙ্গে কথা
বলতে শুরু করলে—কেউ কারও কথায় কান দিতে রাজি হল না।
উজ্জ্বল নীলমণি তাঁর মিহি মেয়েলি গলা তারায় চড়িয়ে বন্ধুতা শুরু
করলেন। “পিকোলোর” আওয়াজ যেমন ব্যাণ্ডের গোলমালকে

ছাড়িয়ে ওঠে—তঁার আওয়াজও এই হৈ চৈ-এর উপরে উঠে গেল। সকলে শুনতে পেলে তিনি বলছেন—

—আগে আমার কথাটা শেষ করতে দিন—তারপর যত খুসি চৌচামেটি করবেন। স্বকীয়া ত পদকর্তাদের মতে “কস্মীনারী”—সে না হলে সংসার চলে না; কিন্তু রত্ন-সাহিত্যে তার স্থান কোথায়? দেখান ত পদাবলীতে.....

—রক্ষা করুন গৌঁসাইজি থামুন, আপনার ও সব মত এখানে চলবে না, আপনার পাস-করা শিষ্টেরা হ'লে ওর যা হয় তা একটা আধ্যাত্মিক ব্যাখ্যা বার করতে পারত, কিন্তু দেখছেন না পণ্ডিত মশায় রাগ করে উঠে যাচ্ছেন। আপনার পাপের বোঝা আমার ঘাড়ে নিতে আমি মোটেই রাজি নই। দাঁড়ান পণ্ডিত মশায়। ব্যাপারটা কি তা না বুঝেই আপনারা সব চঞ্চল হয়ে উঠেছেন। আসলে ঘটনা এই যে, মেয়েটি সধবা বটে কিন্তু পরকীয়া নয়।

—তুই দেখছি বেটা একেবারে বেপরোয়া হয়ে গিয়েছিস—মা মুখে আসছে তাই বলছিস। স্ত্রীলোকটা হ'ল সধবা অথচ কারও স্ত্রী নয়। এমন অসম্ভব কাণ্ড মগের:মুলুকেও হয় না।

—হজুর, আমি মিছে কথা বলি নি। মেয়েটির বিয়ে হয়েছিল বটে কিন্তু দশ বৎসর স্বামী নিরুদ্দেশ। আর সে যখন স্বামীর পথ চেয়ে বসে বসে শেঁষটা হতাশ হয়ে পথে বেরিয়ে পড়েছে—তখন তাকে বে-ওয়ালিশ হিসেবেই ধরতে হবে।

—“নষ্টে মৃত্তে প্রব্রজিতে” এ বচন শাস্ত্রে থাকলেও কাব্যে নেই। একালে ও ওসব কথা মুখে আনতেও নেই, কেমনা তা শুনে অর্ধকটীনদের মতিভ্রম হতে পারে। আজ যদি তোমরা ও সব কাব্যে.

চালাও, দু'দিন পরে তা সমাজে চলবে, তারপর সব অধঃপাতে যাবে। দেখো ঘোষাল, তুমি আমার অতিশয় প্রিয়পাত্র, পুঞ্জতুল্য, কেননা তোমার নব নব উন্মেষশালিনী বুদ্ধি আছে; কিন্তু রত্নরসের ভূত যখন তোমার ঘাড়ে চাপে—তখন তুমি এত প্রলাপ বকো যে প্রবীণ লোকের পক্ষে সে ক্ষেত্রে তিস্কোনো ভার। আজ যেরকম উচ্ছ্বলতার পরিচয় দিচ্ছ, তাতে আমি তোমাকে ত্যাগ করতে বাধ্য হচ্ছি।

এই বলে পণ্ডিত মশায় ঘর থেকে বেরিয়ে যাচ্ছিলেন, কিন্তু বিকচ্ছ হওয়ায় তাঁর গতিরোধ হ'ল। এই স্রবোগে ঘোষাল তাঁর কাছে জোড়হস্তে নিবেদন করলে—

—আপনি আমার ধর্ম-বাপ। আপনার পায়ে ধরি আমাকে বিনা অপরাধে ত্যজ্যপুঞ্জ করে চলে যাবেন না। এতটা উতলা হবার কোনই কারণ নেই। সিন্ধেয় সিন্ধুর থাকলে যে সধবা হতেই হক্বে এমন ত কোনও কথা নেই। ও মেয়েটি ছিল ভৈরবী, তাই না তার মাথায় ছিল রুলি।

এ কথা শুনে সভা আবার শান্ত হ'ল, স্মৃতিরত্ন তাঁর আসন গ্রহণ করলেন। রায় মহাশয় কিন্তু খাড়া হয়ে বসে বজ্র-গস্তীর স্বরে বললেন—

—ঘোষাল, তোর গল্প বন্ধ কর—নইলে কত যে মিথ্যে কথা বানিয়ে বলবি তার আর আদি অন্ত নেই—আজ তোর ঘাড়ে রসিকতার নয়, মিথ্যে কথার ভূত চেপেছে, ঝাঁটা দিয়ে না ঝাড়লে তা নামবে না।

—হজুর, আমার একটি কথাও মিছে নয়। ভৈরবী না হলে কি

গেরস্তর কি বউ লাল শাড়ী পরে, লাল দোপাট্টা ওড়ে, কাছা
কৌচা দেয়, মাথার চুল চূড়া করে বাঁধে, এক কপাল সিঁহুর লেপে—

—হোক না ভৈরবী, তাতেই তুই বাঁচিস কি করে? ভৈরবীর
আবার প্রেম কিরে—

—ছজুর এতক্ষণই যদি ধৈর্য ধরে থাকলেন, তবে আর একটু
ধাঁকুন। গল্পের শেষটা শুনলে আপনি নিশ্চয়ই খুসি হবেন। শুনুন—

ঐ ভৈরবীট আর কেউ নয়, ঐ ব্রাহ্মণের ছেলেরই স্ত্রী। ভদ্রলোক দশ বৎসর
নিরক্ষর হয়েছিল। দেশের লোক বললে তার মুতু হয়েছে। কিন্তু পতিপ্রাণা
রমণী সে কথাই বিশ্বাস করলে না। “আমার সিঁথের সিঁহুরের যদি জোর থাকে,
তবে আমার হাতের লোহা নিশ্চয়ই ক্ষয় যাবে। আমি দিব্যচক্ষু দেখতে পাচ্ছি
আমার স্বামী হয়েছেন স্বামীজি।” এই বলে সে স্বামীর সন্ধানে ভৈরবী সঙ্গে
বেরিয়ে পড়ল। ভগবানের ইচ্ছায় এই পুণ্যস্থানে ছন্দনের আবার মিলন হ’ল।
স্ত্রী স্বামীকে দেখামাত্রই চিন্তে পেরেছিল, কারণ এই দশ বৎসর শয়নে স্বপনে সে
ঐ স্ত্রীই ধ্যান করেছিল। কিন্তু স্বামী তাকে চিন্তে পারে নি দেখে সে স্বামীকে
একটু খেলিয়ে সরাসরের ঘোলাজল থেকে গার্হস্থ্যের শুকনো ডাটার তোলবার মত-
লাবে এতক্ষণ ঝড়সড় হয়ে ও মুড়িমুড়ি দিয়ে ছিল। তারপরে যখন সে চান্দরখানি
মাথা থেকে কেলে দিয়ে সটান এসে স্বামীর হৃদয়ে দাঁড়াল, তখন ব্রাহ্মণ সন্তান
বুকতে পারলে “এই সেই”; অমনি সেই বৈদান্তিক-শাক্ত “তত্ত্বমসি” বলে ছুটে তাকে
আলিঙ্গন করতে গিয়ে হাতের মধ্যে কিছুই পেলে না, শুধু ঘেয়ালে তার মাথা ঠুঁকে
গেল। সঙ্গে সঙ্গে একটা দমকা হাঁওয়ার মন্দিরের ছয়ের খুলে গেল আর তার
চিত্তের ভোরের আলোর বেধাগেল মন্দির একেবারে শূন্য

—এ আবার কি অদ্ভুত কাণ্ড ঘটালি।

—ছজুর ভূতের গল্প শুনতে চেয়েছিলেন তাই শোনালুম।

বলা বাহুল্য ঘোমালের হাতে গল্পের এইরূপ অপমৃত্যু ঘটায়, সব

চেয়ে ক্ষিপ্ত হয়ে উঠলেন উজ্জ্বল নীলমণি। তিনি দাঁত-খিঁচিরে
বললেন—

—ভূতের গল্প না তোমার মাথা! পেঙ্গীর গল্প!

এই সময় বাড়ীর ভিতর থেকে খবর এলো যে মাঠাকুরাণীর মাথা
খরোছে। রায় মহাশয় অমনি ছড়মুড় করে উঠে ব্যতিব্যস্ত হয়ে
তঁার পঁয়ষট্টি বৎসরের ভোগায়তন দেহের বোকা কায়ক্রেপে অন্তর
খসকে নিয়ে গেলেন। সঙ্গে সঙ্গে সভাও ভঙ্গ হ’ল।

শ্রীপ্রমথ চৌধুরী।